

## XTIIDZ DIOS MIÑE PQUIAA

# JUAN

---

**1** <sup>1-2</sup>Jesús, men ne nac Diidz Ndzon, nole me zeene bíaa grëtaa ncuaañe no; lo Dios no me ni Diosaque nac me. Notaque me, tibaque nac me: me ni Dios. <sup>3</sup>Me bzaa grëtaa ncuaañe no, tsod ncuaañe lega scase niaan; sac me bzaaw grësew. <sup>4</sup>Ladznia me no guielmban ne gdzind dze lozh, nac guielmban co zig tib biini ne rziini lo miech. <sup>5</sup>Me nac biini ne quiaziiini zaatne nac lo guielcow, ni rrieeod guielcow ctsew lo biini co.

<sup>6-7</sup>Bio tib mgui brieelë Juan, Dios pxeel Juan biadnee Juan lo miech cho nac Jesús, zeena grëse zho gliladz Jesús. <sup>8</sup>Led Juand nac biini, sinque loxaque bíaad Juan bíaadlu Juan Jesús, men ne nac biini co. <sup>9</sup>Bdziñ dzew laa Jesús bíaad, ni niina me nac men ne noziini lo grëse miech, sac mepaa nac biini co.

<sup>10</sup>Jesús nac biini, me nac Diidz Ndzon co. Me bzaa guidzliu, per zeene bíaad me lo guidzliu ib biend miech cho nac me. <sup>11</sup>Per ni menladz me, niicle ne lopaa zho bdziñ me ib gondzed zho me; tib chop zha ne blëzlo me. <sup>12</sup>Ni grë zha ne sca bleynie me, grë zha ne dib zdoó gliladz cho nac me, grëse zha co laa me bzo zho gac zho xpëed Dios. <sup>13</sup>¡Grëse zho, rrieequia gol zho stib! Per guiabd ne togo gol zho zigne ral grë miech guidzliu rii, sinque laa zho gol zigne racladz Dios; gane niina xpëed me nac zho.

<sup>14</sup>Zeene bdziñ dze ne laa men ne nac Diidz Ndzon ga goc miech bíaad me lo guidzliu, grop lo no bdziñ no me, ni bzianie no me. Blu me pa lotaa nquialadz me miech, ni niapse diidzli bnee me. Bdzion no xquielndzon me ne nac me tibpaa mëed lo Dios, men ne nac Pxoze ne.

<sup>15</sup>Zeene bzeet Juan Bautist me lo miech, tib vuelt haxta blu Juan me lo zho, rëb Juan: “Lëë men rii ga gon rzet naa lo to zeene rne naa: Iraa ziaad tib men ne mazdraa non lo naa, sac notaque me; nole me zeene blanso naa lo guidzliu.”

<sup>16</sup>Nquialadzdox Jesús ne, grëse ne gzataa dze laa ne nogaa grëtaa guielnzaac ne rsiaab me. <sup>17</sup>Zeene psan Moisés ley, loxaque bnabeya ne; sangue niina ne laa Jesús bíaad, laa me bíaadnie miñe nacpaa diidzli ni bíaadlu me ganle pa lotaa nquialadz Dios miech.

<sup>18</sup>Wlaltaa ib choot gard gan Dios; sangue niina ne laa Xpëed me Jesús bíaad, men co bíaadlu ganle zha nac Dios; sac zaatne no Dios gaque no me.

### Rnee Juan Bautist cho nac Jesús

(Mt. 3:11-12; Mr. 1:7-8; Lc. 3:15-17)

<sup>19</sup>Tib dze, pxeel grē zha ne nac zha non Jerusalén bla zha ne nac pxoz, ni zla zha ne rquianap yadoo, zienabdiidz zho lo Juan dien cho nac Juan.

Bdziñ zho bñabdiidz zho lo Juan. <sup>20</sup>Dzigo bneeli Juan lo zho, rēb Juan:

—Golgacnan ganle, led naad nac Men ne quiambēz to ga cxeel Dios.

<sup>21</sup>—¿Chox nac luu waa? —rēb zho—. ¿Te luu ye nac Lí, men ne biadteed xtiidz Dios padzeela?

Pquiab Juan rēb Juan:

—Lēda, led Líd naa.

Biire zho bñabdiidz zho, rēb zho:

—¿Te luu ye nac men ne bzeet Dios padzeela cxeel me guiadteed xtiidz me?

Pquiab Juan rēb Juan:

—Zhaa men co, led naad nac men co.

<sup>22</sup>—¿Cho dzigo nac luu? —rēb zho—. Bñē dien cho nac luu; sac gon ib none gdzinnie no tib xtiidz luu lo zha ne pxeel no.

<sup>23</sup>Dzigo pquiab Juan, rēb Juan lo zho:

—Naa nac mgui ne bzeet Isá, men ne biadteed xtiidz Dios padzeela, zeene znu bnee me: “Zon to zēēb tsi tib mgui dan rnee me lo miech: ¡Golgun nguudz zdoo to, sac gon ile ziaad men ne rnabey ne!”

<sup>24</sup>Hor co laa zha ne pxeel zha farisé pquiab, rēb zho lo Juan:

<sup>25</sup>—Telne led luud nac Men ne zēēble diidz ga cxeel Dios, niicle led luud nac Lí, niicle nacdgaa luu cho stib zha ne pxeel Dios ziadteed xtiidz me, ¿zha nac dzigo ne nochoobnis luu miech?

<sup>26</sup>Pquiab Juan rēb Juan:

—Tel naa niab nis rchoobnis naa miech, per no tib men ne gard gunbey to.

<sup>27</sup>Tib men non nac me, per ni par gac naa tib ngundziin win ne glit lab me ni me raguiald naa; ni merle csilo gon me dziin ne pxeel Dios me gon me.

<sup>28</sup>Betain lē tib guiedz ne riaan gax ro guiubee Jordán, nēz ne rlan ngbidz; ga no Juan nochoobnis me miech zeene scataa pquiep zho me.

### ¿Cho nac Jesús?

<sup>29</sup>Biet stib dzew, laa Jesús bdziñ zaatne no Juan ga. Zeene gon Juan me, rēbchaa Juan lo grē miech ne ndxie ga:

—¡Golwi ganle, lēē men qui gon csilaa miech lo grētaa xto! zho! ¡Me gac zig tib carner yeen ne guet tsogon lo Dios par guiaanmbe miech lo dol! <sup>30</sup>Lēē men rii ga nagon rzet naa lo to zeene rne naa: “Iraa ziaad tib men ne mazdraa non lo naa, sac notaque me; nole me zeene blanso naa lo guidzliu.” <sup>31</sup>Len dze co niicle naa runbeyd naa me; per laa naa nochoobnis miech sac ible laa naa zial par glu naa me lo grē zha Israel.

<sup>32</sup>Dzigo bzodiidz Juan lo zho, zha gonlo Juan biet Espíritu Sant gbaa, rlu me zigne rlu tib palom blēz me guic Jesús.

<sup>33</sup>—Ne nligaa runbeyd naa me —rëb Juan—. Per zeene pxeel Dios naa zialchobnis naa miech, hor co në me lo naa: “Zeene gan luu quiet Espiritu Sant gbaa cuëz me guic tib mgui ne nochoobnis luu, dzigo gocnañ lëë men co nac men ne rxeel Espiritu Sant zdoo miech.” <sup>34</sup>Gonlo naa blëz Espiritu Sant guic me; gane nanween naa ne nli Xpëed Dios nac me.

### Zha ne glopaa goc xpëedscuel Jesús

<sup>35</sup>Biini liu co, laa Juan zoque ga zonie me chop xpëedscuel me. <sup>36</sup>Ga zo me, gon me laa Jesús zieded ga; dzigo rëbchaa me lo zho:

—¡Golwi ganle! ¡Lëë men qui gon nac Xcarner yeen Dios!

<sup>37</sup>Zigne bin zhow, laa zho zienal zhits Jesús. <sup>38</sup>Zeene ptsire lo me, gon me laa zho nalë zhits me; dzigo rëbchaa me lo zho:

—¿Pe nac ziaadnal to zhits naa?

—Maestro —rëb zho—, laa no racladz gacndion no dien pa rbëz luu.

<sup>39</sup>Dzigo rëbchaa me lo zho:

—Na ganle guio ne, zeena gan to paw.

Nacne güeynal zho zhits me, gon zho pa lo no me; dzigo blëz zho lo me ga. Ga blozh ptse zho dze, sac ziedezele dze zie zho.

<sup>40</sup>Ndrës lë tib zha ne güeynal zhits me ga; lëë Ndrës co nac bets Simón Pedr.

<sup>41</sup>Dzigo zigne brieë Ndrës ga güey Ndrës güeyguib Ndrës Simón. Bdzin Ndrës rëb Ndrës lo Simón:

—¡Nasi gon laa no bdzion Men ne nacle diidz ga cxeel Dios!

<sup>42</sup>Dzigo güeynie Ndrës Simón zaatne no Jesús ga. Zeene gon Jesús Simón, rëbchaa me lo Simón:

—Bina ganle, nli Simón nac lë luu ni xingan Jonás nac luu, sangue niina laa luu grieelë Cef.

(Cef rnee zha Israel quie, laa xtiidz zha Gres rnee zhow Pedr.)

<sup>43</sup>Biet stib dze co, laa Jesús no nëz tsie me nëz Galilé. Laa me zieriee dze ga, zeene bdzieel me tib mgui lë Lip; dzigo rëbchaa me lo Lip:

—Dënal zhits naa.

<sup>44</sup>Zha Betsaid nac Lip, ni zha coque nac Ndrës grop Simón.

<sup>45</sup>Dzigo güey Lip güeyguib Lip Natanael; rëb Lip lo Natanael:

—¡Laa no bdzion Men ne nacle diidz ga cxeel Dios! Men ne rzeet Moisés lo libr ley ne psan me, men ne scataa bzeet grë zha ne biadteed xtiidz Dios padzeela. ¡Laa no bdzion me, tib men Nazareta, lëë me ga nac Jesús, xingan José!

<sup>46</sup>Pquiab Natanael, rëb Natanael:

—¿Nazaret ye? ¡Gard grieequia tib zha non Nazaret!

—Gotsaa guio ne ganle —rëb Lip—, zeena ganzhal luu me.

Dzigo laa zho zie. <sup>47</sup>Squi ziaad Natanael, zeene gon Jesús Natanael rëbchaa me:

—¡Golwi ganle, lëë zha qui gon nac merpaa zha Israel, sac mesi ib rquidied me!

<sup>48</sup>—¿Zha nacne runbey luu naa? —rëb Natanael.

Pquiab me rëb me:

—Glole naa beenbey luu, dzigoraa bredz Lip luu. Zeene zob luu tib zhan yag guigw, hor co gon naa luu.

<sup>49</sup>Rzee zdoo Natanael, rëb me lo Jesús:

—¡Nlique nagon luu nac Xpëed Dios! ¡Luu nac zhirey zha Israel!

<sup>50</sup>Dzigo rëbchaa Jesús lo Natanael:

—¿Pe ne binse luu ni naa gon naa zeene zob luu tib zhan yag guigw, pe mincose laa luu bliladz cho nac naa? ¡Naraa ganle gan luu ncuane mazdraa nroob!

<sup>51</sup>Ni rëb me lo grë zha ne ndxie ga:

—Gneli naa lo to: zanaque to ganle zeene laa zhan gbaa gzhial, zlupaa grë xanjl Dios, zha ne ziad-zëeb zha ne ziequia, quiyun zho dziin lo naa, nac naa Mgui ne pxeel me.

### Güey Jesús tib lo guieltsieel

**2** Goc tson ngbidza, bio tib guieltsieel guiedz Caná, xtan zha Galilé ga. Dzigo bredz zho xniaa Jesús lo lni co, <sup>2</sup>ni bredz zho me; nacre bional no zhits me grëse no ne nac no xpëedscuel me.

<sup>3</sup>Laa lni noyac, tibaque zeene laa vin blozh. Dzigo güey xniaa Jesús rëb me lo Jesús:

—Laa xvín men rii blozh. ¡Guiendraa pe quiiz zho!

<sup>4</sup>Pquiab Jesús rëb me:

—¿Pe nacre rnee luuw lo naa? Gon ganle naraa gdziñ dze ne gacnan miech cho nac naa.

<sup>5</sup>Niicle sca rëb Jesús lo me, güey me lo zha ne quiaguiz vin ga rëb me lo zho:

—Mine gnabeytaa me to, golguna.

<sup>6</sup>Lidz men co ga ndxie xoop guies ne niaa quie; zaatne rio nis ne rquiin zha Israel riar nia zho, zigne nac grë xcostumbr zho. Tib tib guies co, rio maase xoopga re nis lena. <sup>7</sup>Dzigo bnabey Jesús zha ne rguiz vin ga pcodzëe zho nis len gza guies co. <sup>8</sup>Blozhse guiel guiel pcodzëe zhow, rëbchaa me lo zho:

—Golcuee niip nis qui, golt sieniew lo men ne zo lo lni.

Zeene laa zho blee niip nis co tsienie zho, laaw nacle vin. <sup>9</sup>Ni lalnu ib güeynied guic men co pa brieve vin co (loxaque zha ne nacse ngundziin ga, zha ne blee nis ga, zha cose gon pa brieew), zeene pquiaaro mew, bredz me mgui ne notsieelna ga, rëb me:

<sup>10</sup>—¡Zha nan luu naraa cuee luu vin rii! Grëtaa zaatne znu rac lni, glo rgaaz vin niazh, zeene nrooblew noye zho, dzigo rgaaz vin ligase. Laa luu gon lel naraa bnabey luu brieve vin niazh.

<sup>11</sup>Milagr ne been Jesús guiedz Caná ga, ga gloopaa blu me lo miech ganle nli tib men nroob nac me. Grëse no ne nac no xpëedscuel me, zeene bdziñ now, hor co bliladz no nli me nac Men ne zëeble diidz ga cxeel Dios.

<sup>12</sup>Zeene blozh guieltsieel co, laa no wbire guiedz Capernaum stib grë no me, xniaa me, ni zha bets me ne. Bdziñ no Capernaum, ga bliaaz no blalaa ngbidz.

### Blee Jesús grë zha ne noyūn lgui len yadoo

(Mt. 21:12-13; Mr. 11:15-18; Lc. 19:45-46)

<sup>13</sup>Len dze ne ziaadyob lni Pascw, lni nroob ne run zha Israel rsoladz zho zha psilaa Dios zho Egipt, len dze co briece Jesús zie me nēz Jerusalén.

<sup>14</sup>Bdziñ me Jerusalén, güey me len yadoo nroob ne zob lad guiedz co. Zeene bzëeb me, gon me nzian miech ne ndxie ro yadoo co, zha ne no wto ngon, zha ne no wto mëcwxiił, zha ne no wto palom ne, haxta zha ne rtsëe dimi ndxie ga. <sup>15</sup>Dzigo bzhixcuaa me tib lë doo zig ríaa dooguid ne rcaa ma, bzhen me doo co bencxoon me zho ga grë xma zho; blozh ga, ptiixche me xmez h zha ne notsëe dimi ga, nēzrii nēzrec blaal me xtimi zho.

<sup>16</sup>—jNiinagazh golcuae grë ncuaan qui nu! —rëb me lo zha ne rto palom—. jGolguien ganle lidz Pxo z naa nu! jNacda yu lgui parne tso to wto nu!

<sup>17</sup>Dzigo psoladz no zha ziaad lo Xtiidz Dios, zaatne rnee: “Rbinladz guic naa, sac ne nligaa racladz naa yquiaanap naa lidz luu.”

<sup>18</sup>Blalaa zha non lo menguietz Israel, zeene gon zho sca bencxoon me grë miech co, wbig zho lo me rëb zho:

—jCho nac luu ne squitaa noyūn luu grë ncuaan qui? jBeen tib milagr, dzigo zlıladz no men rnabey nac luu!

<sup>19</sup>—Telne racladz to milagr —rëb me—, goltsil yadoo rii, ni gni naa lo to ganle ngbidz tsona laa naa bzaalolew stib.

<sup>20</sup>Pquiab zho rëb zho:

—jNcuaane gliladzdraa no rnee luu! jLen choopxopraa iz name bġaa yadoo rii! jZhazhe gun luu, tsonaque ngbidz gzaa luuw stib?

<sup>21</sup>Per zeene sca bnee Jesús lo zho, xcuerp me ga nac yadoo ne bzeet me.

<sup>22</sup>Gane zeene brieegan me, hor co psoladz no zeene znu bnee me, dzigo bien no ne me ga bzeet me ni bien no ne me ga raquiet lo Xtiidz Dios zaatne scaque rnee.

<sup>23</sup>Len dze lni Pascw co, nzian miech zeene gon zho grëtaa milagr ne run me, bliladz zho ne nli me nac Men ne zëeble diidz ga cxeel Dios. <sup>24</sup>Per ib pxiend me lo zho, sacne nanwen me zha nac zho tib tib zho. <sup>25</sup>Pquiind me chopaa niab lo me zha nac zho; sac nanwen me zha nac tib tib miech ni nan me pe rza zdoo zho.

### Jesús ni Nicodem

**3** Ziecowle liuw, bdziñ tib zha farisé lë Nicodem zaatne rbëz Jesús; tib zha non nac me lo menguietz Israel. Bdziñ me rëb me lo Jesús:

<sup>2</sup>—Maestro, ndion no ible Dios pxeel luu ziadseed luu no. Grë milagr nroob ne run luu, ga rlu ne Dios nacie luu.

<sup>3</sup>—Gneli naa lo luu ganle Nicodem —rëb Jesús—, grëse miech, telne gald zho stib grielod gdziñ zho zaatne rnabey Dios.

<sup>4</sup>Pquiab Nicodem, rëb Nicodem:

—¿Gal zho stib ye? ¿Zha grieelo gal miech stib? Tib zha ne nacle mengol, ¿niacxe zrieelo sëëb zho zdoo xniaa zho gbiire gal zho?

<sup>5</sup>Rëbchaa Jesús:

—Ible none gal miech, none gal zho zigne racladz Dios. Sac telne chobnisd zho ni ygaad zho Espíritu Sant, grieelod sëëb zho zaatne rnabey Dios. <sup>6</sup>Grëse miech zeene ral zho glo, miechse nac zho; sangue zeene ral zho stib, Espíritu Santle nac men ne rnabey zho. <sup>7</sup>Gacxe waa, gzeed zdoo luu znu rne naa: “Grëse miech, ib none gal zho stib.” <sup>8</sup>Nac cuent rii zig nac me ne rtop xcow, zeene rriee me, nëzrii nëz rec zie me, ron luu razh zhoob me; per ranð luu dien pa nëz zie me dien pa nëz ziaadgaa me. Scaque nagon nac zha ne ral stib, grieelod guien miech zha rnabey Espíritu Sant lo xquielmban zho.

<sup>9</sup>—Riend naa zha rnee luu —rëb Nicodem—. ¿Riend naa dien zha grieelo gac grë mine rnee luu i!

<sup>10</sup>Rëbchaa Jesús:

—¿Riend luu ye zha rne naa? ¿Men rseed miech name nac luu lo menguedz Israel! <sup>11</sup>Mine rne naa nu ncuane rien naaw, ncuane gon naaw, ni riende to zha naca. <sup>12</sup>Telne riend luu zha nac grë mine rne naa nu zeene rzet naa ncuane rac lo guidzliu, ¿zha dzigo guien luu mine gne naa telne gzet naa grë ncuane rac gbaa?

<sup>13</sup>Wlaltaa gard tso tib zha ne soquia gbaa, per no tib men ne biet gbaa, men cosi soquia me gbaa, sac ga nac zaatne no me; ni lëe men co nu nac naa. <sup>14</sup>Ni zigne pquianga Moisés tib meel brons tib guic yag zeene nonie me zha Israel dan zit co; scaque none yquianga naa tib lo yag, <sup>15</sup>zeena grëse miech, zha ne gbig dib zdoo zho gnalo zho naa, zgaa zho tib guielmban ne gdzind dze lozh. <sup>16</sup>Sac gon rleyniedox Dios grëse miech ne ndxie lo guidzliu; gane niicle tib naa nac mëed lo me per laa me pxeel naa lo guidzliu; zeena grëse zha ne gnalo naa, zgaa zho tib guielmban ne gdzind dze lozh; led yed zho nitlo.

<sup>17</sup>Laa Dios pxeel naa lo guidzliu par csilaa naa miech lo dol, ziald naa par gdziibdol naa miech. <sup>18</sup>Sac grëse zha ne dib zdoo gnalo naa ne naa csilaa zho lo dol, nitlod zho. Sangue zha ne gnalod naa, laa zho bnitlole ga, sac gon Xpëed Dios nac naa ni bliladzd zho naa. <sup>19</sup>Laa zho bnitlole, sac gon biaadpaa biini lo guidzliu ni laa ne nleynie zho biini, lel guielcow bleynie zho, sac guielntseeb nac mine zienal zho.

<sup>20</sup>Grëse zha ne run guielntseeb, rlëe zho ran zho biini. Ib rbigd zho lo biini, sac racladzd zho xoobnen grë guielntseeb ne quiayun zho. <sup>21</sup>Sangue zha ne run mine rnabey Dios, haxta rley zho rbig zho lo biini, zeena glu ganle zienal zho mine rnabey me.

### Rzeet Juan Bautist Jesús stib

<sup>22</sup>Ga brieë Jesús güeynie me no nëz xtan zha Judé. Xtselaa bliaaz no ga grë no me, rchoobnis me grë miech co.

<sup>23-24</sup>Leñ dze co gard guiab Juan Bautist ladzguiib; dzigo ye me nochoobnis miech zaatne lë Enón gax Salim; sac ga no naal nis. Nzian miech ne rdziñ lo me ga, rchoobnis me zho.

<sup>25</sup>Tib dzew, wbig tib zha Israel lo zla xpëedscuel Juan, psilo zho nodildiidz zho dien cho zhiwrobnis nonraa; pe zhiwrobnis Jesúsa, te zhiwrobnis Juana ye. <sup>26</sup>Blozhse bdildiidz zho, wbig xpëedscuel Juan lo Juan, rëb zho:

—Maestro, men ne gon bzodiidznie luu ro guiubee Jordán ga, men ne scataa bzeet luu lo miech, ¡ye me laa me quiachooobnis miech niina, ni ndal miech niapse lo me zie zho, ziaatraade zho nëz rii!

<sup>27</sup>Pquiab Juan rëb Juan:

—Ib Dios rdeed diidz zha gun miech tib tib xtsiin me, gacd ne lega zhal zho gun zho pe cos. <sup>28</sup>Mine pso Dios naa, laaw ben naa: laa naa biallu ganle cho nac Men ne zëëble diidz ga cxeel Dios. Ni bneeli naa lo to ganle led naad nac men co; laa naa zial loxaque par gzet naa me lo miech zeena gunbey zho me.

<sup>29</sup>Ible lo me none gdziñ miech. Nac me niina zig tib mgui ne notsieelnia: Mgui ne notsieelnia, ¡led zha lëë rzobnie ndzoop ne notsieelnia zho! Ni grë zha ne ndzieeldiidz zho, rley zho ran zho laa xamigw zho notsieelnia, rley zho ron zho pe rnee xamigw zho. Scadaa nagon rzaac naa niina: rley naa ron naa grë ncuane run me. <sup>30</sup>Zigse zie dze, laa me gacnonraa; scagaa naa, zigse zie dze laa naa guiaanwinraa.

<sup>31</sup>Nëz gbaa ziaad me, min co ne mazdraa non me lo grë miech. Tel naa tib miech guidzliuse nac naa, ni ncuane riense tib miech lo guidzliu min co rne naa; <sup>32</sup>sangue me, niapse grë mine bin me, grë mine gon me min co rnee me lo miech; ¡ni choot rliladzda! <sup>33</sup>Zha ne rliladzse xtiidz me, rien zho ganle niapse diidzli rnee Dios. <sup>34</sup>Xtiidz Dios rnee me lo miech; sac Espiritu Sant rdeed guieibiini lo me, ni Dios nac men ne pxeel me.

<sup>35</sup>Rleyniedox Dios me, nac me Xpëed Dios; gane grëtaa ncuane no gbaa, no lo guidzliu, ladznia me psan Diosa. <sup>36</sup>Grëse zha ne gnalo me, laa zho bgaale tib guieimban ne ib gdziñ dze lozh; sangue zha ne gond xtiidz me, gdziñ zho gbaa, zaatne ygaa zho guieimban co. ¡Grëse zha co, ible zgaa zho guiein dox ne csiab Dios!

### Tib wnaa Samar

**4** Zeene bien Jesús laa zha farisé gocnanle ndalraa miech zianal zhiwseed me, ni ndalraa miech ne quiachooobnis me lo Juan <sup>2</sup>(niicle ne led medpaa rchoobnis, sinque zha ne nac xpëedscuel me zha co rchoobnis), <sup>3</sup>nacne briece me xtan zha Judé ga, wbire me nëz xtan men Galilé stib.

<sup>4</sup>Par gdziñ me Galilé, none ted me xtan men Samar. <sup>5</sup>Xtan men Samar zieded me, zig groi dzew, laa me zie gax guiedz ne lë Sicar, <sup>6</sup>dzigo güeyted me zaatne quia guiuu ne rnee zho “Zhibzie Jacob”; lo liu ne psan Jacob lo xpëed me José padzeela. Rdzag me ziaad-zë me lo nëëg co, bdziñ me bzob me ro guiuu co; <sup>7-8</sup>ga blëz me, laa no zio lad guiedz Sicar zioxi no ncuane dioownie no me.

Ro guuu co zob me bdziñ tib wnaa Samar ziexi nis ga; dzigo rëbchaa me lo wnaa co:

—Bzhiguiel̄ bzoladz niip zhis luu guie naa.

<sup>9</sup>Bzee zdoo wnaa co gon̄ me bnab Jesús nis lo me, sac rlëëdox zha Judé ran̄ zho zha Samar, per ni rneed zho lo zho.

—¡Ncuaañe gliladz naa! —rëb me—. ¡Ti zha Judé gnab nis lo ti zha Samar! Dzigo rëbchaa Jesús:

<sup>10</sup>—Tel̄ niaca miñe guien̄ luu gan̄le cho rnab nis lo luu, ni guien̄ luu zha nactaa ncuaañe rzoladz Dios lo miech, haxta znab luu nis lo naa. Ni naasi gon̄, znedz naa nis ne rneed guiel̄mban.

<sup>11</sup>Pquiab wnaa co, rëb me:

—Per ni nzhen̄d luu name pe cuee luu nis, ¿pa dzigo tsiebee luu nis ne rneed guiel̄mban ga? ¡Gon̄ gan̄le, quietdox bzie rii! <sup>12</sup>Stiba, ¿niacxe mazdraa dzigo nac luu que pxozgol ne Jacob, men̄ ne psan̄ bzie rii? Nu name go me nis grë xma me; niicle grë xpëëd mew, nuque go zho nis.

<sup>13</sup>—Grëse zha ne rie nis rii —rëb Jesús—, rbiire rnab zhis zho; <sup>14</sup>sangue nis ne rded naa, zha ne guiew gdzindraa dze gnab zhis zho. Sac nis ne gded naa, masaque gdziba zdoo zho zig rdzib nis tib ro zhlian, ni nis co gdeed tib guiel̄mban ne gdziñ dze lozh lo zho.

<sup>15</sup>Dzigo rëbchaa wnaa co lo Jesús:

—Bzhiguiel̄ bneedz nis co guie naa, zeena gnabdraa zhis naa, zeena guial̄xidraa naa nis nu.

<sup>16</sup>—Güeygazh —rëb Jesús—, güeyxi tsieel luu, dzigo goltë grop to.

<sup>17</sup>—Guien̄d tsieel naa —rëb wnaa co—. Gard ctsieelnia naa.

—Nli rnee luu —rëb Jesús—, <sup>18</sup>sac gaay mgui ne zibannie luu, ni tib zho ptsieelniad luu, niicle mgui ne nonie luu niinaw, ptsieelniadaque luu zho. ¡Nli miñe rnee luu i!

<sup>19</sup>Zeene bin wnaa co sca rëb Jesús, rëbchaa me:

—Zootne tib zha ne ziadnee xtiidz Dios lo miech nac luu. <sup>20</sup>Tel̄ scaw, bzhiguiel̄ bnë dien̄, ¿zha nacne rnee grë men̄ Israel ne len̄ yadoo nroob ne zobpaa Jerusalén, gapaa none tsiegan̄ miech Dios? Sac no ne nac no men̄ Samar, rnee no ne ib guic gui ne zob nu, ga none tsiegan̄ miech Dios; sac grë xmengol no ga güeygan̄ zho Dios.

<sup>21-24</sup>Pquiab Jesús rëb me:

—Bina gan̄le, zdziñ dze zeene yquiindraa ne goon̄ guic gui riipaa, o Jerusalénpagaa tsie to tsiegan̄ to Dios men̄ ne nac Pxoze ne. ¡Ni laa dze co ziaadgaxle! Gacdraaw ne dien̄ pa lo tsie ne tsiegan̄ ne Dios, sinque zha ne nlipaa racladz gleynie me, none dib zdoo zho gleynie zho me; zigne gdeedse Espíritu Sant guiel̄biini lo zho.

’Choot grielod gan̄ Dios; gacxe waa zha ne gleynie me, none gleynie zho me zigne rdeed Espíritu Sant guiel̄biini lo zho; ni none dib zdoo zho gleynie zho me. Ni zha ne sca gleynie me, zha co rguib me. Tel̄ to laa to rieganse Dios



ni runbeyde to me; sangue no rdziuunbey no men ne rioğan no, sac gon lo xtiı men Israel ziaad men ne guiaadsilaa miech lo dol.

<sup>25</sup>—Nenda —rëb wnaa co—, per nan naa ib ziaad Men ne zëëble diidz ga cxeel Dios, men ne lë Crist; ni zeene laa me guiaad, me gnë diidzli lo no.

<sup>26</sup>Pquiab Jesús, rëb me:

—ıNaa gon nac men co! Lëe me nu nonee lo luu.

<sup>27</sup>Lëetaque hor co grëse no ne nac no xpëëdsuel me laa no bdzin. Bzee zdoos no bdzıon no laa me nozodiidznie wnaa co, per ni tib no bnabdiidz lo me dien pe quianabdiidz me, dien pegaa quiazodiidznie me wnaa co.

<sup>28</sup>Laa wnaa co, zoque xche me ga, rias me laa me zie nëz lad guiedz. Bdzin me, rëb me lo grë miech co:

<sup>29</sup>—ıGoltë ganle gunbey to ti men co! ıBzeet me grëse zha nac lo xquielmban naa! ıBay pe lëdle Men ne nole diidz cxeel Dios ga?

<sup>30</sup>Hor co brieegrë miech co lad guiedz, ziaad zho zaatne gon wnaa co Jesús.

<sup>31</sup>Laa no, quia no rdeed no ncuane gow me, per nëd me.

<sup>32</sup>—Gowd naa —rnee me—. No stib xquielwagw naa mine runbeyde to.

<sup>33</sup>Dzigo rnabdiidzlsa no, rnee no:

—Bod no cho biaadnie pe dow me, lal ne bio ne lad guiedz.

<sup>34</sup>Nëchaa me lo no:

—Lëe xquielwagw naa nac ne gun naa mine rnabey Dios naa, ni csiaal naa dziin ne pxeel me naa zialgun naa. <sup>35</sup>To lëe rnee to: “Leñ stapraa mëe csilo gac wlaap.” ıPer golwi lo grëtaa miech qui ganle, nac zho niina zig grë guielgon ne golle gliiap! <sup>36</sup>Gacxe waa, ib none tsie to tsielaap to, tsietop to zho, zeena ygaa zho tib guielmban ne gdzind dze lozh. Ni zigne razh zha ne rie wlaap, scaque zguizh Dios to tsietop to zho. ıTi guielbley nrooba, zigtaa par zha ne rana, zigtagaa par zha ne rlaapa! <sup>37</sup>Ible nli diidz ne znu rnee: “Zhaa zha ne rie gon, stible zha ne rie wlaap.” <sup>38</sup>Zig nac niina, laa naa rxel to tsielaap to zaatne ni tib xtsiin to psëëbde to; zhaa zha ne güey gon, na tole tsie wlaap.

<sup>39</sup>Laga laa me sca quianee lo no, laa grë menladz wnaa co no nëz ziaad zho nëz lo no ga. Nzian grë miech co, zeene bin zho rëb wnaa co bzeet Jesús grë ncuane ziyun me, bliladz zho Jesús. <sup>40</sup>Laa zeene blanso zho ga, bnab zho lo me cuëz me ladz zho zhis. Dzigo nacne blëz me lo zho chop ngbidz. <sup>41</sup>Nzianraa grë miech co bliladz me, zeene bin zho grë zhiwseed me.

<sup>42</sup>—Nasi nagon laa no rliladz me —rnee zho lo wnaa co—, sac nozhal bdzıon me, ni bdzıon no grë mine rnee me. Nliw, ible me nac men ne ziaadsilaa grëse miech lo xtol zho.

### **Biac xpëëd tib zha ne quia dziin lo rey**

<sup>43</sup>Zeene goc chop ngbidz co, laa no brieegazga no me, laa no bdzio nëz stib zio no nëz Galilé. <sup>44</sup>Niicle ne bzeetle me: grëse zha ne ziadteed xtiidz Dios, ib randzed miech zho zaatne nac ladz zho; per <sup>45</sup>zeene bzëëb me grë guiedz ne ngab Galilé, wen pcaania grë miech co me. Nzian zho güey İni Pascw co Jerusalén, gon zho grëtaa milagr ne been me ga.

<sup>46</sup>Nëz no no bdziñ no Caná, zaatne sca bzaalo me nis vin. Ga bdzieelo me tib zha Capernaum, tib zha ne rquia dziin lo rey; lëëtaque leñ dze co rzacnë xpëed me.

<sup>47</sup>Bin me laa Jesús brieë xtan meñ Judé, laa me no gdziñ Galilé. Dzigo biaad me biaddzieelo me Jesús ga, bnaab me lo Jesús tsienal Jesús zhits me Capernaum, tsiegunguiac Jesús xpëed me; sac nzhoo rac win. <sup>48</sup>Dzigo rëbchaa Jesús lo me: —¿Pe haxta gan to dzigo gun naa milagr, dzigoraa gliladz to naa?

<sup>49</sup>—Been tib guieñzaac gotsaa guioniob ne —rëb meñ co—, nend znuse lozh xpëed naa.

<sup>50</sup>Rëbchaa Jesús:

—Bzë, tsod luu guieñë. ¡Laa xpëed luu biacle!

Dib zdoo meñ co bliladz me xtiidz Jesús, laa me bio nëz laa me zey. <sup>51</sup>Zhilew gdziñ me lidz me, zeene bdzieelo me bla zha ne quia xtsiin me, rëb zho laa xpëed me biacle. <sup>52</sup>Dzigo bnabdiidz me lo zho, maase pa hor biac win. Rëbchaa zho: —Nieeg, zig rwe ngbidza, tibaque znuse brieë zhixlëë win.

<sup>53</sup>Dzigo psoladz me zig hor cotaque rëb Jesús lo me, laa xpëed me biacle. Dzigo dib zdoo me bliladz me Jesús, tsieel me, xpëed me, menlidz me ne, grëse zho dib zdoo zho bliladz zho Jesús.

<sup>54</sup>Ga goc brop milagr ne been Jesús lo zha Galilé. Miñ co been me zeene wbire me nëz Judé.

### Biac tib meñ ne gacd grial

**5** Goc palal dzew, laa stib lni nroob rac Jerusalén, dzigo nacne güey Jesús Jerusalén stib.

<sup>2</sup>Ro guiedz Jerusalén, gax zaatne quia Puert ne rded Mëcwxiil, ga niaa tib pil nis rnee zho Pil Betesd. Igo ro pil co niaa tib nsaap, rap nsaap co gaay arcw.

<sup>3</sup>Lo nsaap co, ga ndxie nzian meñ rzacnë, no zho rold lo, no zho në ni, no zho ib gacd grial [grëse zho laa zho ndxie ga quiambëz zho gni lo nis ne no leñ pil co, <sup>4</sup>sac nac diidz poc poc riet tib xanj] Dios riesini lo nis co, dzigo zha ne znuse sëëb lo nis co, teñ pe guieñguiidztaa rzac zho, riac zho].

<sup>5</sup>Ga nix tib mgui, gocle galtsiipxon iz rzacnë me. <sup>6</sup>Laa zeene gon Jesús me, ni bin Jesús scataale nroob dze rzacnë me, rëbchaa Jesús lo me:

—¿Pe racladz luu guiaac luu?

<sup>7</sup>—Racladz naa —rëb me—, per guieñd cho csëëb naa leñ pil qui zeene laa lo nis rni. Zeene racladz naa sëëb naa, zhaale stib zha ne glo rzëëb.

<sup>8</sup>Dzigo rëbchaa Jesús lo me:

—¡Nasca zeena guche i! ¡Bzoli, bi yag ne bzhoob luu i, zeena bzë!

<sup>9</sup>Zigne sca rëb Jesús, laa meñ co biac. Hor cogazh blis me yag co, nzëni me laa me brieë ga.

Ni ne dze co nac tib dze nda lo zha Israel, <sup>10</sup>zeene gon zho ney me yag ne bzhoob me, rëbchaa zho lo me:

—¿Pe riend luu nda nadze! ¡Lëda i gon squi yquianlan luu ncuaan qui dze rii!

<sup>11</sup>Pquiab me rëb me:

—Men ne beenguiaç naa, mezhal në lo naa, güey naaw.

<sup>12</sup>—Çho men sca në lo luu? —rëb zho.

<sup>13</sup>Niicle me riendaque dien chow, sac ndaldox miech ne ndxie ga; hor co laa Jesús bzëëble lad grë miech co. <sup>14</sup>Haxta len yadooraa bdzieel Jesús me, dzigo rëbchaa Jesús lo me:

—Nana gon ne squi laa luu biacle, bien gunctaldraa luu xtol luu. Sac telne gond luu diidz, nend dzigole glaan luu tib guielguidz ne mazdraa ntseeb.

<sup>15</sup>Zeene laa me briece ga, güey me lo zha ne rnabey lo zha Israel ga, rëb me lo zho Jesús nac men ne beenguiaç me. <sup>16</sup>Nacne psilo zho quianał zho dien zha gnaaz zho Jesús pe nacne runguiaç me miech dze nda. <sup>17</sup>Blisqui zhow lo me, dzigo rëbchaa me:

—Tel Pxoz naa gzataa dze quiayun me dziin; ni mincoque nac mine quiayun naa.

<sup>18</sup>Zeene gon zho sca rëb me, mazdraa blëe zho lo me rzac zho tebaa zha gutgazh zho me. Rlëe zho, sac zianałd me dien pa dze nda; mazdraa zeene rëb me Dios nac Pxoz me, sac ga rlu me ne lalga nac me con Dios.

### Men nroob nac Xpëed Dios

<sup>19</sup>Ni rëb me:

—Gneli naa lo to ganle: peet grieelod gun Xpëed Dios lega guicse me, sinque ncuaañe ran me run Pxoz me, min co run me. <sup>20</sup>Nquialadzdox Dios me, grëtaa dziin ne run Dios rlu Diosa lo me; gane zun me milagr nroob ne mazdraa gzee zdoos to; ncuaañe palalse i gon to niina ne biac men qui. <sup>21</sup>Sac telne gacladz me cueeban me tib mengut, zbeeban me zho, zigne rbeebanaque Pxoz me mengut. <sup>22</sup>Ni bzo Dios me, me gun guielwxtis, <sup>23</sup>zeena grëse miech guien ganle zigne nonaque Pxoz me, scaque men non nac me, ni sca none gunnon zho me. Sac tel zha ne gunnond me, yele Pxoz me ga (men ne pxeel me) runnond zho.

Ni rëb me:

<sup>24</sup>—Gneli naa lo to ganle: Zha ne gliladz xtids naa, ni gliladz zho men ne pxeel naa, laa zho bgaale tib guielmban ne gdzind dze lozh. Led yedraa zho ygaa guielnë dox ne ygaa grëraa miech ntseeb; sac laa zho briecele ladznia guielgut ga, bdzin zho lo guielmban co. <sup>25</sup>Zdzin dze zeene ye grë mengut, zon zho xtiidz Xpëed Dios; ni grëse zha ne gzoobdiaga, zban zho. ¡Ni lëe dze co bdzin niina! <sup>26</sup>Sac gon, zigne rdeed Dios guielmban lo miech, scaque zrieelo gded naa guielmban lo miech. <sup>27</sup>Ni bzo me naa, naa gun guielwxtis, gded naa mine tsieguial tib tib miech.

<sup>28</sup>¡Gzeed zdoos to! Sac ne nligaa, zdzin dze, grëse mengut ne no len baa, laa zho grieceban <sup>29</sup>zeene gon zho tsi naa. Grëse zha ne ndzinli wban, hor co laa zho ygaa tib guielmban ndzon; sangue zha ne been guielntseeb, hor co laa zho guey lo guielnë dox ne rieguial zho.

<sup>30</sup>Per grieelod gun naa guielwxtis naase, ib none gacnan Pxoz naaw. Grëse guielwxtis ne gun naa, laaw gun naa zigne gnabey Pxoz naa, laaw gun naa

zigne nonguiela, sac gon guñd naa mine guiaabtaa guic naa, sinque laa naa gun mine racladz Pxoz naa.

<sup>31</sup>Telne niaca mine naase rne cho nac naa, zrieequia zha ne guiab nlida. <sup>32</sup>Per na, no stib men ne rzeet naa lo miech; ni nan naa diidzli rnee me. <sup>33</sup>Haxta Juan Bautist, zeene pxeel to bla zha ne güeynabdiidz lo me, grëse mine rëb me lo zho ga, diidzliw. <sup>34</sup>Laa naa rzet min rii lo to, zeena gliladz to cho nac naa, zeena sca laa to lo xtol to; sac rquiindpaa dien cho miech guidzliu rii gnee cho nac naa.

<sup>35</sup>Zeene biaad Juan, goc me zig tib biini bziini me lo to palal dze zeena gunbey to naa; ni bley to pquiaadiag to mine bnee me. <sup>36</sup>Nli bnee me cho nac naa; per grë milagr ne run naa min co quiaxobnenraa ganle cho nac naa. Pxoz naa rneedz diidz run naaw; ni ga rlu ganle ne me pxeel naa. <sup>37</sup>Haxta ye me mezhal quialu ganle cho nac naa, parga nli gard gan to me, niicle gard gon to tsi me. <sup>38</sup>Ronde to pe rnee me, sac rililadzde to naa; sac gon me pxeel naa zialne naa xtiidz me.

<sup>39</sup>Nli rioxco to rseed to grë guits ne ziaad Xtiidz me, sac rien to ga ziaad dien zha yгаа to guielmban ne gdzind dze lozh. Ni niicle ne lo co zhobnee ganle cho nac naa, <sup>40</sup>per nëde to gbig to lo naa, zeena yгаа to guielmban co. <sup>41</sup>Nëde to gunbey to naa, nëde to guien to cho nac naa, per peet nacd min co; <sup>42</sup>runbey naa to, ni lalnu rleyniede to Dios. <sup>43</sup>Sac gon, me pxeel naa zial naa lo to, ni rlëe to ran to naa; mazd zha ne lega ziaadse, zha cosi lëëlëd rcaania to zho. <sup>44</sup>Min co gon, ib rililadzde to cho nac naa! Sac laa guic to zienie loxaque dien zha gunnon samiech to to, ib rguibde to zha gacnon to lo Dios.

<sup>45</sup>Ni guiabde to togo naapaa gazo to lo Pxoz naa, glisqui naa grë ncuaañe run to. Moisés gon nac men ne glisquiw; sac ley ne psan me, mine rnalo to csilaa to lo xtol to, lëew glu ganle pe nac grëtaa ncuaañe quiayun to. <sup>46</sup>Sac gon, telne niaca mine nliipaa rililadz to grë mine pquiaa Moisés, zliiladz to dzigo cho nac naa; golgan ganle, lo grë guits ne pquiaa me, ga rzeet me naa. <sup>47</sup>Rlu rililadzde to grë mine pquiaa Moisés ga, gane rililadzde to mine rne naa lo to.

### Row gaay mil miech

(Mt. 14:13-21; Mr. 6:30-44; Lc. 9:10-17)

**6** Bded ga, tib dzew brieë Jesús bdedquia me nëz dan ro Nisdoo Galilé (lëëque nisdoo co ga rnee zho Nisdoo Tiberias).

<sup>2</sup>Miech guizhiu ne brieenał zhits me, sac ziyañ zho grëtaa milagr ne run me, runguiac me grë men rzacnë. <sup>3-4</sup>Nzian zho nac zha ne zie lni Pascw, lni nroob ne rac Jerusalén gzobse iz.

Grëse no ne nac no xpëedscuel me, laa no nal zhits me. Zeene bdieedquia no ro nis co, dzigo bdzieep no tib cho gui win zob gax ga. Loxaque laa no bzioob ga grë no me, <sup>5</sup>zeene bdzion no miech guizhiu ne ziaadquia cho gui co, laa zho glansole lo no ga. Dzigo rëbchaa me lo Lip:

—Lip, ¿pa guioziu ne ncuaañe gow grëtaa miech qui?

<sup>6</sup>Per lega scase rëb me lo Lip, par dien pe guiab Lip; sac nanle me pe nac ncuaane gun me.

<sup>7</sup>—¡Ne nligaa pe zhidaa zho! —rëb Lip—. Niicle telne niaca mine gziuu nzian gayoo quietxtil, ni ygaad ncuaan co yгаа zho tiblë wingaw tib tib zho.

<sup>8</sup>Dzigo pquiab Ndrés, bets Pedr, stib zha ne nacgza no; rëb Ndrés:

<sup>9</sup>—Nu zo tib mëëdbgui win ney gaay quietxtil cebad ni schop mel win. ¿Per pa yгаа ncuaan co lo grëtaa miech qui?

<sup>10</sup>—Golnee lo zho dien —në me lo no—, golguiab lo zho sob zho.

Ndzon zëëb guizh nguia ga, dzigo laa grë miech guizhiu co bzob lo guizh nguia co (zig gaay mil rgaa loxaque zha bguise). <sup>11</sup>Dzigo bnaaz me gza quietxtil co, bdeed me xquizh lo Dios. Blozhse ga, zigse rneedz mew lo no scase scase rguiiz now lo grë miech co; scaque been me grop mel co. ¡Grëse miech co, dow zho zaatne bieltaa zho! <sup>12</sup>Blozhse dow zho, nëchaa me lo no:

—¡Goltsietop grëse mine biaan i, zeena nitloda!

<sup>13</sup>Psilo no ptop no grë quietxtil ne biaan ga, zeene blozh bdopa, ¡lo gaay quietxtil cebad co, biodzë tsiipchop chicuid biow!

<sup>14</sup>Zeene gon grë miech co milagr ro ne been Jesús ga, rneechaa zho:

—¡Ne nlipagaa, lëe men qui ga quiambiaaz ne! ¡Me nac Men ne zëëble diidz ga cxeel Dios lo guidzliu guiadteed xtiidz me!

<sup>15</sup>Bienga Jesús racladz zho, zhoo tsienie zho me gac me zhirey zho, nacne bzoquia me guic gui win co, tipse me.

### Rzë Jesús lo nis

(Mt. 14:22-27; Mr. 6:45-52)

<sup>16</sup>Rguetsle liuw, bzhiuxto no dan bdziñ no ro nisdoo co; ga bliiaz no me. <sup>17</sup>Bdzionse no choot ransod ni laa liu rcowraa, dzigo mazd laa no bziaab len canó, laa no zio nëz Capernaum.

<sup>18</sup>Laa no zionie canó co lo nis, tibaque zeene psilo rriee me, ntseeb riasoli lo nis co. <sup>19</sup>Maase gaay kilómetro o xoopgaaw goc zio no, tibaque zeene bdzion no laa me ziaad-zë lo nis co, gaxle lo no ga. Zeene bdzion no sca ziaad-zë me lo nis, bdzieeb no. <sup>20</sup>Dzigo bnee me, në me lo no:

—¡Gdziebde to! ¡Naa zial nu!

<sup>21</sup>Dzigoraa rley no bdzion no laa me bzëëb len barcw; tibaque zeene bien no laa no brieequiale zaatne no gdziñ no ga.

<sup>22</sup>Biini liu co, grë miech ne biaan stib nëz ro nis co, laa zho bdziñ zaatne nac ro nis ga, quiambëz zho gan zho me. Sac gon zho tibaque barcw zo ga, ni zeene wbii no ga, loxaque nose wbii. <sup>23</sup>Gax zaatne bguiaan me zho ga, ga bdziñ bla barcw ne ziaad nëz Tiberias; <sup>24</sup>dzigo gonse zho niicle me niicle no ne nac no xpëëdiscuel me, choot guiend ga, nacne bzëëbaque zho len barcw ne bdziñ ga ziaad zho nëz Capernaum.

### Jesús nac men ne rdeed guiemban

<sup>25</sup>Zeene blanso zho Capernaum, laa Jesús zole lo no ga; dzigo rëbchaa zho lo me:

—Maestro, ¿pa horzhe waa blanso luu nu?

<sup>26</sup>Dzigo rëbchaa me:

—¿Naa lëë ziaadguib to? Per ziaate to porne rien to cho nac naa, sinque laa to ziaad porne gon to bnedz naa ncuaane pquiin to. <sup>27</sup>¿Golguien, tsienied guic to loxaque ncuaane gowse to, sac znuse rnitlo grë ncuaan co! Sinque, goltsoxco golgun mine racladz Dios, zeena yгаа to tib guielmban ne ib gdzind dze lozh. Ni naa ne nac naa Mgui ne pxeel me, naa gneedz guielmban co lo to; sac ible min co pxeel me naa.

<sup>28</sup>Dzigo bnaabdiidz zho lo me, rëb zho:

—¿Zha dzigo dziuun no mine racladz Dios? ¿Pe nac ncuaane dziuun no?

<sup>29</sup>Pquiab me rëb me:

—Mine racladz Dios gun to: gliladz to cho nac men ne pxeel me.

<sup>30</sup>—Telne scaw —rëb zho—, none dzianlo no gun luu nzian milagr, zeena gliladz no luu. ¡Nligaa peet milagr nroob gard dzian no gun luu! <sup>31</sup>Tel grë pxozgol ne, zeene wban zho grë dan bidz co padzeela, gzobse dze biet tiblo quietxtil zhan gbaa, dow zho; rnee lo Xtieldz Dios: “Moisés rdeed quietxtil co lo zho.”

<sup>32</sup>Pquiab me rëb me:

—Golgacnan ganle led Moisésd bdeed quietxtil co, sinque Pxoza naaw. Ni niina gon laa me quianeedz merpaa quietxtil gbaa lo to. <sup>33</sup>Sac gon, me pxeel men ne biet gbaa ziaddeed guielmban lo grë miech rii; men co nac quietxtil gbaa co.

<sup>34</sup>—Been tib guielnzaac sca —rëb zho—, ¡gzataa dze bneedz quietxtil co dioow no!

<sup>35</sup>Pquiab me rëb me:

—Naa gon nac quietxtil ne rdeed guielmban ga. Grëse zha ne gbig lo naa sëëb zho xnëz naa, gdzindraa dze ne ycaabedz zho; grëse zha ne gliladz cho nac naa, gdzindraa dze ne gnab zhis zho. <sup>36</sup>Laa to gon, zigne bnelegaa naa lo to ga, ¡niicle ran to naa, per riladzde to cho nac naa! <sup>37</sup>Grëse zha ne rxeel Pxoza naa, rlanso lo naa; ni tib zho ctsireed naa. <sup>38</sup>Sac gon, laa naa bieet gbaa zialgun naa mine racladz Pxoza naa (men ne pxeel naa); bieete naa par gun naa mine gacladztaa naa. <sup>39</sup>Ni mine racladz me, grëse zha ne bneedz me lo naa, ni tib zho nitlod, sinque cueeban naa zho gal dze ne laa guidzliu nitlo. <sup>40</sup>Sac racladz me: grëse zha ne gbig lo naa ni gliladz zho naa dib zdoo zho, grëse zho yгаа tib guielmban ne ib gdzind dze lozh, ni cueeban naa zho gal dze ne nitlo guidzliu.

<sup>41</sup>Dzigo psilo grë zha Israel rneenë zho me, loxaque ne rëb me, me nac quietxtil ne biet gbaa; <sup>42</sup>rnee zho:

—Men rii ga name rnee zho Jesús, me nac xingan José. Rdziuunbey ne xniaa me, rdziuunbey ne pxoz me. ¿Zha nac dzigo ne rnee me gbaa biet me?

<sup>43</sup>Dzigo rëbchaa me lo zho:

—Lëëwga na, golsioog ro to. Nodne squitaa gzee zdoo to min co. <sup>44</sup>Laa Pxoza naa pxeel naa zial naa lo guidzliu, per ni tib miech gon grielod gbig lo naa

telne niaca miñe cuedzd me zho; ni zig rnele naa ga, zha ne gbig, naa cueeban zho gaḷ dze ne laa guidzliu nitlo. <sup>45</sup>Znu rnee lo Xtiidz Dios, zaatne pquiaa grë zha ne biadteed xtiidz me padzeela, rneew: “Laa Dios cseed grëse miech.”

<sup>46</sup>Ni lëë miñ co rac niina; gacxe nagon waa, grëse zha ne rquiaadiag miñe rnee Pxoza naa ni rseed zhow, grëse zha co lo naa rlanso zho. <sup>47</sup>Zha ne rlanso lo naa, guiabde to togo gonlo zho me; ni tib choot gard gan me, naase nac men ne ziyā me, sac zaatne no me ga brie naa zial naa lo to. <sup>48</sup>Golliladz miñe gni naa lo to nu sca: ¡Grëse zha ne dib zdo zho gliladz zho cho nac naa, zgaa zho tib guieḷmban ne gdziñdraa dze lozh!

<sup>49</sup>Ne nligaa naa nac guietxtil ne rdeed guieḷmban ga. <sup>50</sup>Grë pxozgol to, zeene sca bio zho grë dan bidz co, nli dow zho guietxtil ne biet gbaa ga, per bdeetew guieḷmban lo zho, sac grëse zho gut. <sup>51</sup>Sangue guietxtil ne rne naa lo to, gbaa bieta ni grëse zha ne yquiina zgaa zho tib guieḷmban ne gdziñ dze lozh. <sup>52</sup>Xcuerp naa nac guietxtil ne biet gbaa, miñe rdeed guieḷmban ga; grëse zha ne gow guietxtil co, zgaa zho tib guieḷmban ne gdziñ dze lozh. Lëëw gded naa zeena grielo yгаа grëse miech lo guidzliu rii stib guieḷmban.

<sup>53</sup>Psilo grë zha Israel co stib, quianeelsa zho, rnee zho:

—Zha nacne squi rnee men qui? ¡Zootne rnee me none dioow ne xcuerp me!

<sup>54</sup>Gneli naa lo to ganle —rëb me—, telne gowde to xcuerp Mgui ne pxeel Dios, ni guiede to xchen me, ygaade to stib guieḷmban co. <sup>55</sup>Sangue zha ne gow xcuerp naa, ni guie zho xchen naa, ib zgaa zho guieḷmban ndzon ne gdziñ dze lozh ga, ni naa cueeban zho gaḷ dze ne laa guidzliu nitlo; <sup>56</sup>sac xcuerp naa nac miñe mazdraa rquiin gow miech, ni xchen naa nac miñe mazdraa rquiin guie zho. <sup>57</sup>Grëse zha ne row xcuerp naa, ni rie zho xchen naa, mbannie zho naa, niiclegaa naaw mbannie naa zho. <sup>58</sup>Men mban nac Pxoza naa, men ne pxeel naa, me nac men rneedz guieḷmban lo naa; ni scauegaa zha ne gow xcuerp naa, naa gded guieḷmban lo zho. <sup>59</sup>Naa nac guietxtil ne nlipaa biet gbaa. Grëse zha ne gow guietxtil rii, zgaa zho guieḷmban; led yed zho guet zig gut grë pxozgol to, zha ne sca dow guietxtil co.

<sup>60</sup>Lëë grë miñ rii bnee Jesús zeene pseed me miech len yadoo win ne zob Capernaum.

### Diidz ne rdeed guieḷmban

<sup>61</sup>Nzian grë zha ne rzënie Jesús, zeene bin zho grë miñe bnee me ga, rneechaa zho:

—Zha ngandoxtaa nac grë diidz ne rnee me i. ¡Cho gnë dien pe bnee me!

<sup>62</sup>Bien Jesús sca nonee zho, dzigo rëbchaa me lo zho:

—¿Pe rlëë guic to bin to miñe rne naa ga? <sup>63</sup>¿Pe guiabzhe to dzigo zeene gan to laa Mgui ne pxeel Dios soquia gbaa, gbiire guey me zaatne no me glo? <sup>64</sup>Espíritu Sant rneedz guieḷmban lo to, telne guiend espíritu peet nond xcuerp to, sac bëëlse naca. Ni grë diidz ne bne naa lo to, lëëw nac Espiritu, ni lëëw gneedz tib guieḷmban ne gdziñ dze lozh lo to; <sup>65</sup>sinque to, bii no zla to rililadz cho nac naa.

Sca rëb me sac desde psilo bzënie zho me, rienle me cho nac zha ne ib riladzd me, ni cho nac zha ne tsieto me.

<sup>65</sup>—Runbey naa to —rëb me—, gane ni naa lo to ni tib miech grielod gbigo naa sëëb zho xnëz naa, telne niaca minë cuedzd Pxoaz naa zho.

<sup>66</sup>Nzian zha ne rzënie me, hor co laa zho bzoazit lo me, bzëniedraa zho me. <sup>67</sup>Dzigo bnee me lo no gza tsiipchop no ne nac no xpëëdsuel me, në me:

—To waa, ¿pe led yede to racladz gbiche lo naa?

<sup>68</sup>Pquiab Simón Pedr, rëb Simón:

—¿Per cho lora nadien guio no? Luuse nac men ne rseed miech diidz ndzon ne rdeed guielmban ne gdziind dze lozh. <sup>69</sup>Laa no bliladzle cho nac luu, laa no gocndionle ne luu nac Men Ndzon ne pxeel Dios.

<sup>70</sup>—Nliw —rëb me—, ni naa bzooblo to gza tsiipchop to, per na gon laa tib to bzëëble xnëz mendox.

<sup>71</sup>Zeene sca rëb me, lëële Judas ga bzeet me (zhin Simón Iscariot); sac ye Judas nacgza no lo tsiipchop no ne bzooblo me ga, ni Judas nac zha ne güeyto me.

### Riladzd menlidz Jesús cho nac me

**7** Bded ga, loxaque grë guiedz ne ndxie xtan zha Galilé, gasé rieted Jesús. Sac grë zha Israel ne no xtan zha Judé, zha ne rlëë lo me, racladz zho gut zho me. <sup>2</sup>Laa zeene bdziin dze ne run zha Israel lni ne rzhixcuaa zho grë yu guizh, ni rbëz zho lena; <sup>3</sup>rëbchaa zha bets me lo me:

—¿Pe nacne ib rrieed luu nu? Brie zho, güey dib xtan zha Judé, zeena ye grë zha ne racnie luu ga gan grëtaa ncuaane run luu. <sup>4</sup>Sac gon, zha ne racladz gunbeyraa miech zho, grë ncuaane rac zho, rund zhow nguets zhliian zigne run luu. Rac luu name run luu grë milagr nroob, beena zaatne gan nzian miecha.

<sup>5-6</sup>Sca rnee zho lo me, sac niicle zha riladzd cho nac me; dzigo rëbchaa me: —Griyelod ga naa niina, sac gard gdziin dze co; zhaa nac to, zac tsie to zeene gacladzttaa to. <sup>7</sup>Tej to, rlëënie miech to; sangue naa rlëënie zho naa, sac rne naa lo zho pe nac grë guielntseeb ne run zho. <sup>8</sup>Goltsie, tedse lni rii dzigo ga naa; sac gard gdziin dze ne glu cho nac naa.

<sup>9</sup>Dzigo laa me biaan ga. <sup>10</sup>Per loxaque brie zho zie zho, yeque me brie zie me; lëëraasi nguetsse bdziin me.

<sup>11</sup>Grë zha Israel ne rlëë lo me, quiaguib zho me lo lni co.

—¿Bay yo men co? —rnee zho—. ¿Pe nacne ib choot gard dzian me?

<sup>12</sup>Grë zha ne ndxie lo lni, loxaque me rzeet zho. No zho rnee: “Tib miech wen nac me”; nogaa zho rnee: “Pe miech wen na zho gac me, loxaque noquidie me miech.” <sup>13</sup>Per zhlianse rzodiidz zho rzeet zho me, sac rdzieb zho grë zha Israel ne rlëë lo me.

<sup>14</sup>Goc chop tson ngbidz ne noyac lni, tibaque zeene laa me bzëëb len yadoo nroob ne zob lad guiedz ga, psilo me pseed me grë zha Israel ne no len yadoo ga. <sup>15</sup>Zeene gon zho zha rseed me, rzee zdo zho rnee zho:

—¿Zha nac squitaa rac men qui, ni laa me psee me grë zhiwseed yadoo?

<sup>16</sup>Pquiab me rëb me:



—Led naad nobeebey grē mīne quiaseed naa miech, sinque laa naa quiaseed zho mīne rnabey men ne pxeel naa. <sup>17</sup>Telne yquiabladz to gun to mīne rnabey me, ga guien to dien pe nli xtiidz Dios rseed naa miech, te mīne riab guic naaw ye. <sup>18</sup>Sac grē zha ne rnee grē mīne riab guicse zho, laa zho runa zeena gacnziuu zho lo miech; sangue zha ne rioxco glu ne non men ne pxeel zho, zha cosi niapse diidzli rnee zho, rund zho ne yquidie zho miech. <sup>19</sup>Laa Moisés psan ley lo to, per, jni tib to gon zienald mīne rnabeya! ¿Pe nac dzigo racladz to gut to naa?

<sup>20</sup>Pquiab be grē miech co, rēb zho:

—¡Mendzable i gon noguitnie guic luu! ¿Chozhe racladz gut luu?

<sup>21</sup>Rēbchaa me:

—Tib vuilt, loxaque gon to beenguiac naa tib men rzacnē dze ne rdziiladz to lo dziin, na grēga to squitaa rac lo naa. <sup>22</sup>Ni to gon, no hor par gun to mīne rnabey ley run to dziin dze co; zig nac zeene rio tib mēed bey (niicle ne rirole pxozgol to bey co, zeene laa ley biaan). <sup>23</sup>¡Gase na ganle golwi! Rquia to rgo to tib mēed bey haxta dze ne rdziiladz to lo dziin, loxaque par quiitsde to xley Moisés. ¿Pe nac dzigo ne rlēe to lo naa loxaque ne beenguiac naa tib miech dze co? <sup>24</sup>Golguien ganle, nonguield ne lega gdziibdol to tib miech. Goltsoxco golt sienal mīne nac diidzli.

### ¿Cho nac Jesús?

<sup>25</sup>Blalaa men Jerusalén ndxie ga, dzigo psilo zho rnabdiidzlsa zho rnee zho:

—¿Pe led men riid ga zho scataa quiaguib zho gut zho? <sup>26</sup>Pa zotaa me gon quianee me lo grē miech qui, ni choot peet rund me. ¿Pe goon bliladzle zhiwxtis ne naye ne me nac Men ne zēēble diidz ga guiaad lo guidzliu? <sup>27</sup>Per gacda men qui. Tel men kiw, rdziuunbey ne me, ndion ne cho zha nac me; sangue Men ne zēēble diidz guiaad ga, zeene gal dze ne laa me guiaad, choot gacnand dien cho zha me.

<sup>28</sup>Bin Jesús sca nonee zho. Squi ndxie grē zha ne noquiaadiag zhiwseed me len yadoo ga, nguietz bnee me rēbchaa me:

—Ah, conque runbey to naa dzigo, jnan to pa nēz zial naa! Per led zhaald naa gon zial naa, no tib men ne pxeel naa per runbeyde to me; men co nac men ne rnee niapse diidzli. <sup>29</sup>Sangue naa runbey naa me, sac lo me brie naa, me pxeel naa zial naa lo to.

<sup>30</sup>Dzigo gocladz zho naaz zho me ga, per ni tib zho wbigd nzhen zho me; sac gard gal dze co.

<sup>31</sup>Grē zha ne ndxie ga, ndal zho bliladz me.

—Telne led med nac Crist —rnee zho—, niacxe zun me grētaa milagr nroob ne run me. ¡Tsodraa zha ne gun grētaa milagr ne run me!

<sup>32</sup>Bin zha farisé nozeet grē miech co Jesús, dzigo bnediidzique zho grē zho pxoz ne rnabey, pxeel zho bla zhaguiib zie zienaaz me. <sup>33</sup>Bdzin grē zhaguiib co, rēbchaa me lo zho:

—¡Golxecw zniip! Zhile dze ne cuëz naa lo to; ib laa naa none gbiire guia naa lo men ne pxeel naa. <sup>34</sup>Zguib to naa, per gdzieldraa to naa, ni grielod gziñ to zaatne guia naa.

<sup>35</sup>Grë zha ne ndxie ga, zeene bin zho sca rëb me, rzee zdoo zho.

—¡Pa naczhe zaatne tsie me? —rnee zho—. ¿Zha nacne ib gdzield ne me? Nend grë zha ladz ne tsieseed me, grë zha ne no stib ladz ben. <sup>36</sup>¿Zha nacne rnee me, zguib ne me per gdzield me lo ne, niicle grielodgaa guio ne zaatne gey me?

### Nis ne rdeed guielmban

<sup>37</sup>Zeene gol dze ne laa lni co lozh (dze co nac dze ne mazdraa nroob), miech guizhiu ne ndxie; dzigo nguiedz bnee Jesús lo grë miech co, rëb me:

—Grëse zha ne racladz guiaanwen zdoo, rzac zho zig nac zeene r nab zhis zho, guiaad zho lo naa, naa gded nis ne guie zho. <sup>38</sup>Sac grëse zha ne dib zdoo gliladz cho nac naa, rnee lo Xtiidz Dios, masaque rrieequia tib nis ndzon ne gdzib zdoo zho, pale tib guiubee nroob; nis co gdeed tib guielmban cub lo zho.

<sup>39</sup>Sca bzeet Jesús Espíritu Sant. Ga bzeet me, grëse zha ne gliladz cho nac me zacnie Espíritu Sant zho. Gard guiaad Espíritu Sant len dze co, sac gard gbire Jesús lo guielndzon ne no me gbaa hor co.

<sup>40</sup>Blalaa zha ne ndxie ga, zeene bin zho sca bnee me, rneechaa zho:

—Ne nlipagaa, lëe men qui ga no guiaad antes ne glanso Men ne nacle diidz cxeel Dios ga.

<sup>41</sup>Rrieequia zla zha ne rnee:

—¡Lëda! ¡Lëëgash me i! Men qui nac Men ne zëëble diidz ga cxeel Dios guiaad lo guidzliu.

Rquiab zla zha ne rnee:

—Men Galilé nac men qui. ¿Niacxe lo xtii grë zha co grieequia Men ne cxeel Dios ga? <sup>42</sup>Pe led rnee lo Xtiidz Dios lo xtii rey David, ga grieequia me ni Belén ga gal me, zaatne gocaque ladz rey David.

<sup>43</sup>Zhaase zhaase rnee zho; leñ psilo zho nodiñdiidz zho dien cho nac me. <sup>44</sup>Brieequia bla zho gocladz naaz me, per ni tib zho wbigd nzen zho me.

<sup>45</sup>Grë zhaguiib ne zienaaz me ga, scase zho laa zho bdziñ. Zeene gon grë pxoz rnabey co, grë zha farisé co choot bdzinnied zho, rëbchaa zho:

—¿Pe nac dzigo ne ziaadniede to me?

<sup>46</sup>Pquiab zho rëb zho:

—¡Wlaltaa gard dzian no tib men ne scataa ndzon rnee!

<sup>47</sup>Rëbchaa zha farisé:

—¡Pe nlipaa rnee to! ¿Yelaque to dzigo beengüet me? <sup>48</sup>¿Pe rwide to, niicle zhiwxtis new, niicle now, ni tib choot rliladz ne me nac Men ne zëëble diidz cxeel Dios ga? <sup>49</sup>Grë zha nxen ne rliladz ne nli Dios pxeel me, ¡miech ndziibdeele nac zho, sac gon rienñd zho zha rnee lo ley!

<sup>50</sup>Ga zob Nicodem, men ne güeyzodiidznie Jesús ga glo, ye me nacgza grë zha rnabey co, dzigo guso me bnee me lo zho, rëb me:

<sup>51</sup>—Golguien ganle nonguielda ne lega pe gnee ne. Sac gon, zig nac xley ne, rnabeya none gacndiongazh ne zha nac xtiidz tib miech, dien pe nac mine quiaayun zho, dzigoraac gac guielwxtis.

<sup>52</sup>Pquiab zho rëb zho:

—¿Zootne ye luu lëe nacgza grë zha Galilé ne rleynie me? ¡Grë zha ne cxeel Dios, ni tib zho grieequiad Galilé! ¡Luuzhal bguiba lo grë guits ne ziaad Xtiidz Dios ganle, zeena gliladz luu!

<sup>53</sup>Blozh ga, grëse zho laa zho wbi, tib tib zho zeyse zho lidz zho.

### Tib wnaa ro nëz

**8** Ga briece Jesús güey me zaatne rnee zho Gui Oliv.

<sup>2</sup>Zeene biini liu co, silgaw laa me bdzin len yadoo co stib. Nzian miech ne goclo lo me ga, nacne bzob me psilo me pseed me zho. <sup>3</sup>Laa me noseed grë miech co, zeene bdzin bla maistr ley, ni zla zha farisé, bdzinnie zho tib wnaa ne nole tsiel ni bgaanie me stib mgui; dzigo bzo zho wnaa co glowtaa lo grë miech ne ndxie ga.

<sup>4</sup>—Maestro —rëb zho lo Jesús—, laa wnaa rii bgaa nonie me stib mgui. <sup>5</sup>¿Pe gnë luu dien zha gac me? Sac zig nac ley ne psan Moisés, rnabeya gdeedquie no grë wnaa ne squi nac, haxta guet zho.

<sup>6</sup>Sca rëb zho, sac laa zho quiaquib dien zha cxin me tib diidz, zeena sca grielo tsiezo zho me lo wxtis. Per zeene bin me sca rëb zho pquiitsrunga me liu, psilo me con mzhugnia me noquiaa me lo liu.

<sup>7</sup>Ran zho rquiabd me, wbiire zho bnabdiidz zho lo me stib; haxta blis lo me, rëb me lo zho:

—Peet nacda, goldeedquie me. ¡Lëeraasi, zha ne rien ni tib dol rapd, zha co csilo gdeedquie me!

<sup>8</sup>Blozh ga biire pquiitsrun me, psilo me stib noquiaa me lo liu. <sup>9</sup>Zeene bin zho sca rëb me, mazd mine been zho laa zho briece ga, sac bien zho miech ngoopdol nac zho. Zha ne nacpaa zha gol lo zho bner, blozh ga zo zo briece zho grë zho; loxaque wnaa cose biaan ga.

<sup>10</sup>Dzigo bzoli me, rëb me lo wnaa co:

—¿Yo grë zha ne scataa biaad-zo luu nu? ¿Ni tib zho lëe beenquizhd luu xtol luu?

<sup>11</sup>—Ni tib zho —rëb wnaa co.

—Niicle naa —rëb Jesús—, gunquizhd naa luu xtol luu. Bzë, per bien gbiiredraa luu gun luu grë ncuane gunctal xtol luu.

### Jesús nac zig tib biini

<sup>12</sup>Bded ga, tib dze nonee Jesús lo grë zha ne noquiaadiag zhiwseed me, rëb me lo zho:

—Nac naa zig nac tib biini ne rziini lo miech. Grëse zha ne gbig lo naa, led yed zho soriel ni lo ncow, sac naa gziini lo zho zeena ygaa zho tib guielmban ndzon.

<sup>13</sup>Zeene bin zha farisé sca rëb me, psilo zho nguiedz roptsie zho rnee zho: —¿Cho gliladz xtiidz luu! ¡Lëëque luu rnee cho nac luu!

<sup>14</sup>Pquiab me rëb me:

—Niicle ne naaque rne dien cho nac naa, per diidzli nac mine rne naa. Rien naa pa nëz zial naa, pa nëzgaaz naa; sangue to gon peet riende to, <sup>15</sup>gacxe waa, rcaadzdoj to naa ncuaañe ni nacd naa; ncuaañe rcaadzdoj to naa, niapse guic to riaba. Tel naa, zig nac niina noyund naa guielwxtis <sup>16</sup>per zeene gdziñ dze co, tib tib miech mine been zho min co glu dien pe nac mine tsieguial zho; sac Pxoz naa men ne nacie naa, me gnë zha gun naa guielwxtis. <sup>17</sup>¿Pe nacne riladzde to mine rne naa? Led rnee lo xley to zeene tipse rzë xtiidz chop miech, ga rlu ne diidzli rnee zho. <sup>18</sup>Zig nac niina, naa nac tib zha ne rne cho nac naa, laa stib zho nac Pxoz naa men ne pxeel naa; sac gon ye me rnee ganle cho nac naa.

<sup>19</sup>Pquiab zho rëb zho:

—¿Yo Pxoz luu na? ¿Pa no me?

—Runbeyde to me —rëb Jesús—, sac niicle naa runbeyde to naa. Telne niaca mine runbey to naa, runbeyle to me na.

<sup>20</sup>Gax zaatne riesañ miech gon len yadoo nroob ne zob lad guiedz Jerusalén, ga zob Jesús zeene sca rëb me; per choot bnaazd me, sac gard gal dze co.

### Grieelod gdziñ to zaatne guia naa

<sup>21</sup>Bded ga, biire Jesús rëb me:

—Laa naa guia nagon. Squiaguib to naa, per lëëque lo xtoj to i nitlo to, sac zaatne guia naa grieelod gdziñ to ga.

<sup>22</sup>Grë zha Israel ne ndxie lo me ga, rneechaa zho:

—¿Pe goon lëëque me naye gut me? Zha nacne squi rnee me goon grieelod gdziñ ne zaatne guey me.

<sup>23</sup>—Tel to —rëb me—, zha nëz lo guidzliu nac to; laa naa gon zha nëz gbaa nac naa. Men guidzliu rii nac to, sangue naa nacd naa zha guidzliu rii. <sup>24</sup>Gane ni naa lo to lëëque lo xtoj to i nitlo to. Ne nligaa, telne gliladzde to ne naa nac men ne nac naa, ible lëëque lo xtoj to nitlo to.

<sup>25</sup>—¿Cho dzigo nac luu? —rëb zho.

Rëbchaa me:

—Blactaale rne naaw lo to. Haxta zeene psilo naa xtsin naa, laa naa rne lo to ganle cho nac naa. <sup>26</sup>Ndal grë ncuaañe zac glisqui naa lo to nu niina, ni ndal ncuaañe racladz naa gne naa lo to, per laa naa noyund mine rnabeyse men ne pxeel naa; ni men co nac men ne rnee diidzli.

<sup>27</sup>Per ib riend zho ne Dios ga rzeet me lo zho. <sup>28</sup>Dzigo bnee me lo zho stib, rëb me:

—Nieeda gal dze ne yquiaa to naa tib lo yag, dze co gunbey to ganle ne naa nac Mgui ne pxeel Dios ga, dze co guien to ganle led guicd naa riab grë mine quiaayun naa; sinque mine pseed me naa, min co rne naa lo to. <sup>29</sup>Dios

pxeel naa ni tibaque nacie me naa, ib rsaand me naa, sac tibaque noxco naa run naa mine rdziladz me.

### Zha ne nac xpëed Dios

<sup>30</sup>Grë zha Israel ne ndxie ga, zeene bin zho sca rëb me, bliladz zho ne me nac men ne no cxeel Dios ga. <sup>31</sup>Dzigo bnee me lo zho, rëb me:

—Telne racladz to gac to xpëedscuel naa, zha ne nlipaa ygab xnëz naa, none guiaadnal to grëse zhiwseed naa. <sup>32</sup>Sac sca gunbey to mine nacpaa diidzli, ni lëew glu lo to zha laa to ne squi nac to zig tib ngundziin.

<sup>33</sup>Pquiab zho rëb zho:

—iNgundziin ye! iTel no, zha xtiipaa Abraham nac no, wlaltaa gard gac no ngundziin lo miech! ¿Pe lo dzigo laa no, ne rnee luu laa xtiidz luu csilaa no?

<sup>34</sup>Dzigo rëbchaa me:

—Golquiaadiaga ganle: zha ne tibaque noyunctal xtol, rrieequiacxe waa tib ngundziin nac zho lo dol ga, sac lëelew rnabey zho. <sup>35</sup>Ni zha ne nac ngundziin lëe, zig run miech nëz rii, grieelod xoon zho lo men ne rree zho; sangue zha ne nac mëed, choot lo ngadood zho. <sup>36</sup>Gacxe waa, tel csilaa Xpëed Dios to, dzigosi choot lo ngadoodraa to. <sup>37</sup>Nli lo xtii Abraham ziaad to; per laa to quia gon quiaguib to dien zha gut to naa, sac racladzde to yquiaadiag to zhiwseed naa. <sup>38</sup>Laa naa rne grë mine blu Pxoza naa lo naa, zeene no naa lo me; sangue to gon, laa to zienal mine rnabey men ne nac pxoz to.

<sup>39</sup>Pquiab zho rëb zho:

—iNi Abraham gon nac pxoz no!

—iNlid ga nagon! —rëb me lo zho—. Telne niaca mine nli zhinpaa Abraham nac to, zun to grë mine been me. <sup>40</sup>Per na gon lel racladz to gut to naa, loxaque ne rseed naa to mine nac diidzli, mine blu Dios lo naa. iTel Abraham, led squid been Abraham! <sup>41</sup>Ni lalnu zienalde to mine been Abraham, sinque laa to noyun mine run zha ne nlipaa nac pxoz to.

Pquiab zho rëb zho:

—iLed-xe mëed ro nëzd no waa! Tibaque men ne nac pxoz no, ni lëe men co nac Dios.

<sup>42</sup>Dzigo rëbchaa me lo zho:

—Telne niaca mine nli zhin Dios nac to, nleynie to naa, sac gon lo me brie naa zial naa lo to nu. Led zhaald naa zial naa, me nac men ne pxeel naa. <sup>43</sup>Ib riogucde to zha nac grë mine rne naa, ib riende tow, sacne ib nëde to yquiaadiag tow. <sup>44</sup>Golgacnan sca ganle, lëe pxoz to ga gon nac mendox, lo ma ngab to, gacxe waa rdziladz to run to grë ncuaae run ma. Tel mendox, haxta zeene biaan guidzliu tibaque nonitlo ma miech, ni ib rneed ma mine nac diidzli, sac ib nand ma zha nac diidzli. Ible lëe xtsiin ma ga nac guielwquidie, gacxe waa ma nac pxoz zha ne rquidie.

<sup>45</sup>iMin co nagon, niicle diidzli nac grë mine rne naa lo to, per ib rliladzde tow! <sup>46</sup>Ni tib to choot grieelod gnë laa naa noquidie, sac niapse diidzli rne naa. ¿Pe nac dzigo rliladzde to mine rne naa? <sup>47</sup>Grëse zha ne nlipaa ngab xnëz

Dios, rley zho rquiaadiag zho xtiidz Dios; per to gon led xnëzd me ngab to, gacxe waa nëde to yquiaadiag tow.

<sup>48</sup>Hor co pquiab zho rëb zho lo me:

—¡Psoog ro luu men Samar ngoopdo! ¡Nlique mine rnee no ga nagon, ne mendox noguitnie luu!

<sup>49</sup>—Choot mendzab noguitnied naa —rëb Jesús—, sinque laa naa noxco xoobnen ganle pa lotaa men nroob nac Pxoza naa; laa to gon lej rsanwin to naa. <sup>50</sup>Noguibd naa dien zha guiaannon naa, per Dios gon racladz me ne sca gaca; ni mesi nan me pe run me. <sup>51</sup>Gneli naa lo to ganle: ¡Grëse zha ne gzoob xtidz naa, gdzind dze ne guet zho!

<sup>52</sup>Pquiab zho rëb zho:

—¡Per nlique nagon mendox noguitnie luu! Zig nac Abraham name gut me, grë zha ne biadteed xtiidz Dios ne, grëse zho gut zho. ¿Zha nac dzigo rnee luu, zha ne gzoob xtiidz luu, gdzind dze guet zho? <sup>53</sup>¿Pe mazdraa dzigo nac luu lo pxozgol ne Abraham, lo grëgaa zha ne biadteed xtiidz Dios ga? ¿Cho rzac luu nac luu?

<sup>54</sup>Rëbchaa me:

—Telne lëëque naa noyunnon naa, nlid mine rne naa dzigo. Per na gon, Pxoza naa, men ne nac Dios ne rnee to rliladz to, me rlu ganle ne nli men non nac naa. <sup>55</sup>Tel naa runbey naa me, ni run naa mine rnabey me; sangue to gon, nlid runbey to me. Tel gni naa runbeyd naa me, ye le naa ga dzigo noquidie zigne rquidie to. <sup>56</sup>Pxozgol to Abraham, bley me zeene gocnan me laa naa znu guial lo guidzliu rii. Ni zeene bdeed Dios diidz gon me naa, mazdraa bley me.

<sup>57</sup>Zeene bin zho sca rëb me, rëbchaa zho:

—¿Gon luu Abraham ye? ¡Ni chooptsii iz name rapd luu! ¡Zha dzigo gon luu Abraham!

<sup>58</sup>—Gneli naa lo to ganle —rëb me—, notaque naa; nole naa zeene gol Abraham.

<sup>59</sup>Hor co ptop zho quie laa zho gdeedquie me, per znuse bded me lad zho brie me len yadoo, gondraa zho me.

### Biac tib mgui ne rold lo

**9** Zieded Jesús tib lugar co, gon me tib mgui ne rcow lo, scale nac lo men co zeene gol me. <sup>2</sup>Dzigo bnabdiidz xpëedsuel Jesús rëb zho:

—Maestro, ¿bay zha nacne squi golnie men qui guielnë qui? ¿Pe no pe xtol mew, te xtol xmengol mew ye?

<sup>3</sup>—Lëda —rëb Jesús—, led por xtold zhow; sinque squi gol me, zeena zeene laa me guiac, ga gan miech ganle zha nactaa grë ncuane run Dios. <sup>4</sup>Zhile laa liu ycow. None dzioxco ne dziuun ne xtsiin men ne pxeel naa laga nasraa bii zob ngbidz, sac deque ycow liu choot grielodraa gun dziin. <sup>5</sup>Laga bii no naa lo guidzliu rii, naa nac zig tib biini ne rziini lo grë miech rii.

<sup>6</sup>Blozhse sca bnee me, ptsuc me lo liu, bzhixcuaa me niip ben, dzigo bdëeb mew zhits guidlo mgui ne rcow lo ga; <sup>7</sup>blozh ga, rëbchaa me:

—Güey na, güeytiib lo luu ro Pil Siloé.

(Siloé nac zig nacne rnee ne Pxeel zho zho.)

Dzigo güey mgui co güeytiib me lo me, zeene laa me wbire laa me ranle.

<sup>8</sup>Grë zha ne no gax zaatne no me, ni grë zha ne runbey me; zeene gon zho me, rneechaa zho:

—¿Mgui rii ga lëë rzob gdib i rnab gon?

<sup>9</sup>No zho rnee mew, nogaa zho rnee led meda.

—Squidaa rlu me —rnee zho—, per led med i.

Nacne pquiab me mezhala rëb lo zho:

—Naaw, naa nac mgui co.

<sup>10</sup>Dzigo bnabdiidz zho zha biac lo me. Rëbchaa me:

<sup>11</sup>—Men ne rnee zho lë Jesús, men co bzhixcuaa niip ben dzigo bdëëb mew zhits guidlo naa, blozh ga pxeel me naa biatiib naa lo naa ro Pil Siloé; zeene laa naa wbire laa lo naa biacle.

<sup>12</sup>—¿Yo men co niina na? —rëb zho.

—Dieenda —rëb me—, nand naa dien yo me.

<sup>13</sup>Dzigo güey zho güeynie zho me lo grë zha ne nac zha farisé; <sup>14</sup>sac lëëtse dze ne rdziiladz zho lo dziin, lëëtse dze co sca beenguiaac Jesús lo me.

<sup>15</sup>Grë zha farisé co, biire zho bnabdiidz zho lo me dien zha biac me; dzigo bzodiidz me lo zho zha bdëëb Jesús niip ben lo me, blozh ga güeytiib me lo me, zeene laa me wbire laaw biacle.

<sup>16</sup>Blalaa zha farisé ne ndxie ga, psilo zho rnee zho:

—Nlid ne Dios pxeel men co, gacxe waa niicle runbeydraa me pa dze nac dze nda.

Pquiab zla zho rnee:

—Tel cholze miech ngoopdol nac me, ¿niacxe zrielo gun me grë milagr qui? Zhaase zhaase rnee zho.

<sup>17</sup>Dzigo wbiire zho bnabdiidz zho lo me, rëb zho:

—Luu waa, ¿cho rzac luu nac men ne beenguiaac lo luu ga?

Pquiab me rëb me:

—Ible Dios pxeel me. Tib men ne ziadteed xtiidz Dios lo miech nac me.

<sup>18</sup>Per ib rliladz grë zha wxtis co ne biac lo me, sac rliladz zho ne rold lo me glo; dzigo bnabey zho gocredz pxoz me, gocredz xniaa me. <sup>19</sup>Bdzin grop mengol co, rëbchaa zho:

—¿Pe nli xpëed to nac men rii? ¿Pe nli na rold lo me zeene gol me? Tel nli rold lo me, ¿zha biac lo me ne laa me ran niina?

<sup>20</sup>—Nli xpëed no nac me —rëb grop mengol co—. Ni nli rold lo me zeene gol me; <sup>21</sup>per ndiond no dien zha biaca ne laa me ran niina, niicle ndiondgaa no dien pe no cho beenguiaaca. Benque zha gol-le nac me, mazd lo me golinabdiidz, mezhala gnë dien zha biac lo me.

<sup>22-23</sup>Sca rëb grop mengol co, sac rdzieb zho grieve zho xyadoo zho. Biaanle grë zha rnabey co diidz: zha ne guiab Jesús nac Men ne zëëble diidz ga cxeel Dios lo guidzliu; csandaa zho sëëb zho yadoo.

<sup>24</sup>Wbiire zho bredz zho meṅ ne biac lo ga, rëb zho:

—Bien ganle Dios zobwi, bnë diidzli lo no; sac telṅ no ndionṅ no cholze miech ngoopdolṅ nac meṅ co.

<sup>25</sup>—Dieenda —rëb me—. Nand naa dienṅ pe miech ngoopdolṅ nac me, te meṅ wena ye. Per me gonṅ beenguiac lo naa, sac rold lo naa glo.

<sup>26</sup>Dzigo biire zho bnabdiidz zho stib dienṅ zha beenguiac Jesús lo me.

<sup>27</sup>Pquiab me rëb me:

—Ledaaw nile naa lo to, per ib rliladzde tow. ¿Zha nac dzigo ne racladz to gonaque tow stib? ¿Te racladz to ye, ye to sëëb xnëz me?

<sup>28</sup>Dzigo psilo zho ndox zho lo me, rëb zho:

—Luuzhe telṅ xnëz me no luu, sangue telṅ no zhiwseed Moisés, miṅ co zionaṅ lo no. <sup>29</sup>Sac telṅ Moisés, ndionṅ no nli Dios pxeel Moisés, per mgui co ni ndionṅ no dienṅ pa brie me.

<sup>30</sup>Pquiab me rëb me:

—iNcuaneaṅ gzeegaa zdoo ne i runbeydaque to cho nac me, ni ron to me beenguiac lo naa! <sup>31</sup>Ndionṅ ne ganle, rquiaadiagd Dios xtiidz cholze miech ngoopdolṅ, sinque laa me rquiaadiag xtiidz zha ne rienṅ ne nli meṅ nroob nac me, ni runṅ zho miṅe rnabey me. <sup>32</sup>Stiba, waltaa gard dzionṅ ne cho zha beenguiac lo tib miech ne znu gol rold lo. <sup>33</sup>Telṅe niacia miṅe nacdied Dios meṅ co, nriee lod me niunguiac me lo naa.

<sup>34</sup>—iPsioog ro luu! —rëb zho lo me—. iB racladz no guiaad tib ngoopdolṅ nu guiadseed no!

Hor co wbig zho, blee zho me ga.

### Zha ne rold lo

<sup>35</sup>Bin Jesús sca blee zho me ga, dzigo zeene bdzieel Jesús me, rëbchaa Jesús lo me:

—¿Pe rliladz luu meṅ ne nac Xpëed Dios?

<sup>36</sup>Pquiab me rëb me:

—Bzhiguielṅ bnë lo naa dienṅ cho nac meṅ co, zeena gliladz naa me.

<sup>37</sup>—Gonle luu me —rëb Jesús—. Naa gonṅ nac meṅ co, lëe me nu nozodiidznie luu niina.

<sup>38</sup>Dzigo pquitsgzhib me lo Jesús, ni rëb me:

—Dib zdoo naa rliladz naa ne nli Xpëed Dios nac luu.

<sup>39</sup>Blozh ga rëbchaa Jesús:

—Laa naa zialṅ lo guidzliu rii, zeena glu dienṅ cho rap dolṅ, dienṅ chogaa rapd dolṅ; sac zha ne rzac miech peet rienṅ, laa zho tsaabiiini; laa zha ne rzoob zho niini, laa xquielrienṅ zho ycow, guiaanṅ zho zig tib zha ne rold lo.

<sup>40</sup>Blalaa zha farisé zo ga, zeene bin zho sca rëb me, rëbchaa zho lo me:

—¿Rzë diidz qui na lëe ye lo no rold?

<sup>41</sup>Dzigo pquiab me rëb me lo zho:



—Tel̄ niaca miñe nlipaa zha ne rold lo nac to, grielod gni naa rap to dol̄. Per na, ne masaque rzac to rolraa lo to, gane grēse ncuaañe quiayun̄ to xtol̄ to noyaca, to zēēba.

### Mēcwxiił ni zha ne rquianap ma

**10** Ni rēb Jesús:

—Golquiaadiaga ganle: grēse zha rded stib nēz zeene rzēēb zho len lidz mēcwxiił, laa ne ted zho nēz ro puert, gase rlu ngbaan ga nac zho; <sup>2</sup>sac tel̄ men̄ ne noyañ maw, nēz ro puert nēz co rzēēb me. <sup>3</sup>Zha ne rquianap ro lidz ma, ga rxal zho rded me; niicle magaaaw, zeene ron ma tsi me, grēse ma rdziñ lo me; dzigo rbedz me ma, rneelē me ma tib tib ma, laa me rbee ma ga. <sup>4</sup>Rlozhse rbee me grē ma ne nac xma me, laa me rner lo ma; grēse ma laa ma rnal̄ zhits me sacne runbey ma tsi me. <sup>5</sup>Rienald ma zhits stib miech, zeene ran̄ ma zho znuse rzhooñ ma; sac runbeyd ma tsi zho.

<sup>6</sup>Grē zha ne ndxie lo me ga, ib biend̄ zho zha nac godiidz co; <sup>7</sup>dzigo wbiire me bnee me lo zho, rēb me:

—Golquiaadiaga ganle: Naa gon̄ nac zig ro Puert, zaatne rded mēcwxiił ga. <sup>8</sup>Grēse zha ne biaad glo rnee zho zha nac Men̄ ne nacle diidz cxeel̄ Dios ga, grēse zha co ngbaan ga nac zho, loxaque psacsi zho par grielo cuan zho; ni grēse mēcwxiił ne nacpaa xpēcwxiił naa, güeynal̄ ma zhits zho. <sup>9</sup>Sangue naa, laa naa nile lo to ganle: Naa nac zig ro Puert, zaatne rded mēcwxiił ga. Grēse zha ne gbig lo naa, zlaa zho, peet lo tsoxtseebdraa zho; pale grē mēcwxiił ne zozēēb zoríee ro lidz, ni rdziel ma guizh nguia, guizh ndzon row ma. <sup>10</sup>Zha ne nac ngbaan, zeene riaad zho loxaque rban zho ni rut zho; sangue naa, laa naa zial̄ zeena yгаа to tib guielmban ne mazdraa ndzon, tib guielmban ne gdziñd̄ dze lozh.

<sup>11</sup>Naa nac Baxtor ne nquialadzpaа xpēcwxiił. Sac zha ne nquialadzpaа xpēcwxiił, rquiad zdoо zho xquielmban zho, rsilaa zho ma lo guielxtseeb ne notaa ma. <sup>12</sup>Per tel̄ noyac-wree zha ne noyañ ma, rquiad zdoо zho ma, zigne ran̄ zho palo ziaad tib coyot ntseeb, ndxieque mēcwxiił ga laa zho rzhooñ; sac led chend̄ zho ma, led zhad nac xbaxtor ma. Zeene rdziñ coyot, nēzrii nēzrec rtsieets coyot ma, nogaa ma rgaa lo coyot. <sup>13</sup>Rzhooñ zho, sac dimise nonie guic zho, peet liaadz nod zho ma. <sup>14-15</sup>Naa nac Baxtor ne nquialadz xpēcwxiił. Zigne runbey Pxoз naa naa ni runbey naa me, sca runbey naa grēse xpēcwxiił naa, niicle magaaaw runbey ma naa. Grēse ma, rleynie naa ma, laa naa rbeeladz xquielmban naa totsaque cuee naa ma lo guielxtseeb ne no ma.

<sup>16</sup>No spalal xpēcwxiił naa, ma ne ngabd len̄ corral rii; grēse ma co, ible zon ma tsi naa sac laa naa no gaxi ma, zeena tipse gac ma grē ma yquianaap naa ma.

<sup>17</sup>Men̄ ne nac Pxoз naa, rleynie me naa sac laa naa rbeeladz xquielmban naa; per ible zriebaan naa. <sup>18</sup>Naazhal rbeeladz xquielmban naa, choot grielod lega ctiche xquielmban naa. Rap naa poder gded naa xquielmban naa, ni rap naa poder gbire gban naa stib. Dios bneedz diidzbeу co lo naa.

<sup>19</sup>Grë zha Israel ne ndxie ga, zeene bin zho sca rnee me, laa zho goc chop dii stib. <sup>20</sup>No zho rnee:

—Yase mendox noguitnie guic men qui, o rzhinlegaa guic me. ¿Pe nacne rquiaadiag to xtiidz me?

<sup>21</sup>Rquiab stib zho rnee:

—Niini rzë xtiidz men qui, led squid rac zha ne noguitnie mendox. Stiba, ¿niacxe zrieelo mendox gunguiac ma tib lo zha ne rold lo?

### Rnee Jesús Xpëed Dios nac me

<sup>22</sup>Leñ mëë ne rac naļa, leñ dze co noyac tib lni Jerusalén, lni ne run zho rsoladz zho dze ne glopaa psilo quiaquiin yadoo. Ye Jesús bdzin Jerusalén leñ dze co. <sup>23</sup>Laa me zieded tib leñ nsaap ne quia cho yadoo co, nsaap ne rnee zho zhiNsaap rey Salomón; <sup>24</sup>zeene wbig bla zha ne rnabey Israel, bnabdiidz zho lo me rëb zho:

—¿Poc dzigo gdzin dze ne gnë luu diidzli lo no? Telne nli luu nac Men ne zëëble diidz ga cxeel Dios guiaad lo guidzliu, niinagazh bnëw lo no.

<sup>25</sup>Pquiab Jesús rëb me:

—Blactaale zine naaw lo to, per rliladzde tow. Stiba, pe zhidaa milagr ne ziyān to run naa, gase rlu ganle cho nac naa; sac Dios men ne nac Pxoza naa, men co racniēn naa run naaw. <sup>26</sup>Ib rliladzde tow, sacne led yede to ngab lo naa. <sup>27</sup>Tel zha ne ngab lo naaw, runbey zho naa; niicle naagaaw runbey naa zho, ni zhits naa rzēnaļ zho. <sup>28</sup>Grëse zho, rded naa tib guielmban ne gdzind dze lozh lo zho, ni gdzind dze nitlo zho. Choot grielod ctiche zho lo naa, <sup>29</sup>sac men nroob nac Pxoza naa men ne pxeel zho lo naa; choot grielod cuee zho ladznia me. <sup>30</sup>Ni tibaque nac no grop no me.

<sup>31</sup>Zeene bin grë zha rnabey co sca rëb me, psilo zho ptop zho quie nan zho ngoquie zho me. <sup>32</sup>Dzigo rëbchaa me lo zho:

—Lo grëtaa milagr ne quiayacniēn Pxoza naa naa quiayun naa lo to. Golnë dien, ¿pa min rlisqui to ne laa to racladz gneedzquie to naa?

<sup>33</sup>Pquiab zho rëb zho:

—¿Coquiedaxe no luu waa por grë milagr ne run luu, sinque laa no coquie luu por grë diidz ne rnee luu i, quiaguitnie luu Dios! ¿Tib miech bense name nac luu, ni rnee luu laa luu nac Dios!

<sup>34</sup>Dzigo rëbchaa me lo zho:

—¿Lo xlibr ley to name zhoobnee zha rzac Dios zha ne pcaania xtiidz me, rëb me dios nac zho! <sup>35</sup>Ni ndion ne ganle, grëse mine rnee lo Xtiidz Dios, diidzliw; gacxe waa, tel sca rëb me lo zha ne pcaania xtiidz me ga, <sup>36</sup>¿niacxe rguitnie naa me ga, zeene rne naa Xpëed me nac naa, ni mezhal bzooblo naa pxeel me naa lo guidzliu rii? <sup>37</sup>Telne rund naa milagr ne rlu Dios pxeel naa, ib gliladzde to naa. <sup>38</sup>Per telne ran to rlu ne me nacie naa, maase gliladzde to naa totsaque golliladz ne me nacie naa; tsow guien to ganle ne tibaque nac no grop no me, zigtaa nacie me naa, scaque nacie naa me.

<sup>39</sup>Hor co gocladz zho stib naaz zho me, per znuse brie me nia zho. <sup>40</sup>Dzigo brie me ga güey me ro guiubee Jordán, zaatne bio Juan pchoobnis Juan miech; ga bléz me palal dze. <sup>41</sup>Nzian miech ne güey lo me ga, rnee zho:

—Nli beend Juan ni tib milagr nroob, per grëse minë bnee me zeene bzeet me men rii, zigne bneese me laaw norieequia niina.

<sup>42</sup>Nzian grë miech ne güeyquiaadiag zhiwseed me ga, dib zdo zho bliladz zho ne me nac Men ne zëëble diidz ga cxeel Dios.

### Gut Lazh

**11** Len dze co blanguidz tib mgui ne no guiedz Betain, lë Lazh; no chop bzian Lazh tib zho lë Mart stib zho lë Marí. <sup>2</sup>(Lëë Marí rii pchoob tiblo nceit nex ni Jesús, ni pcuiidz mew con guitsguic me.) <sup>3</sup>Dzigo pxeel grop wnaa co diidz lo Jesús, gacnan me laa Lazh rzacnë, sac nan zho rleyniedox me Lazh.

<sup>4</sup>Zeene blanso diidz, nëchaa me:

—Peet tsienied guic to, niicle tel blanguidz me per nacda par guet me, sinque par glu ganle pa lotaa men nroob nac Dios. Ga glu ganle pa lotaa men nroob nac Xpëed me.

<sup>5</sup>Zigtaa Maríw, zigtaa Marta, zigtagaa Lazha, nquialadz Jesús zho gza zho, <sup>6</sup>per ib biobladz me; lel bléz me schop ngbidz zaatne no me ga. <sup>7</sup>Dzigoraa në me lo no:

—Laa ne guio nëz xtan men Judé stib.

<sup>8</sup>Dzigo rdzieets no:

—Maestro, ¿racladz luu tsie luu nëz co stib ye? Pense name goc bla ngbidz ga gocladz zho ngoquie zho luu ga.

<sup>9</sup>Nëchaa me:

—Tsiipchopraa hor name rziini ngbidz, ni laga niini rna zac tibliladz zia ne, noxtseebd ne lega pa griel ni ne; sac ncow rna. <sup>10</sup>loxaque pcow liu, noxtseebd pa griel ni ne; sac ncow rna.

<sup>11</sup>Blozh ga në me:

—Laa xamigw ne Lazh nixguesle, per na laa ne guio zeena gabee naa zhimcaalo me.

<sup>12-13</sup>Tibaque ndion no nli nixgues Lazh, dzigo rdzieets no lo me:

—Telne raaguesle me, zac-wen me sca.

Ib biend no ne gutle Lazh, gane sca rnee me. <sup>14</sup>Dzigoraa clar bnee me lo no, në me:

—Laa Lazh gutle. <sup>15</sup>Ni rley naa gon ne guiend naa ga dze co, zeena sca grielo lozh gliladz to ganle cho nac naa. Golgotsaa guio ne nëz lo me ga niina sca.

<sup>16</sup>Laa Mazh, zha ne rnee zho “Mëedgrop”, zeene bin Mazh sca në me, rneechaa Mazh lo no:

—Guiend rson, golgotsaa cchoob zdo ne guional ne zhits me dien. Tel gut zho me, maase gut zho ne.

### Jesús rbeeban ni me rdeed guielmban

<sup>17-19</sup> Gax Jerusalén riaan Betain. Zha ne rriece Jerusalén, maase groļ hor run zho nēz rdziņ zho Betain. Nzian grē zha Jerusalén rdziņ riequiaabdiuzh zho Marí grop Mart, riechoobladz zho zdoo me lo xquieļnē me ga.

Dze ne rac tap ngbidz bioliu Lazh, dzigoraā laa Jesús bdziņ.

<sup>20</sup> Gon Mart pa lo ziaad Jesús, dzigo briece me biaad-xinēz me Jesús; laa Marí biaan ro yu.

<sup>21</sup> —Jesús —rēb Mart—, telne niaca miņe nu no luu segur niete bzian naa; <sup>22</sup> sac nan naa, grētaa ncuaaņe rnab luu lo Dios, run me miņe rnab luu.

<sup>23</sup> —Peet tsienied guic luu —rēb Jesús—, ible zrieceban bzian luu.

<sup>24</sup> Pquiab Mart, rēb Mart:

—Nliw, nanpaa naa ible zrieceban me gaļ dze ne laa guidzliu rii nitlo, zeene grēse meņgut, laa zho grieceban.

<sup>25</sup> Dzigo rēb Jesús:

—Naa nac meņ ne rbeeban grē meņgut, ni naa nac meņ ne rdeed guielmban lo grē miech. Grēse zha ne dib zdoo gliladz naa, niicle guet zho zig ret grēraā miech rii, zdziņ dze ne gban zho stib. <sup>26</sup> Sac grēse zha ne dib zdoo rililadz naa, laa zho bgaale tib guielmban ndzon ga, guiaand zho ladznia guielgut. ¿Led rililadz luu lēē Mart, ne sca gaca?

<sup>27</sup> —Rililadz naaw —rēb Mart—. Rililadz naa ne luu nac meņ ne bzooblo Dios ga, luu nac Xpēēd Dios, Meņ ne zēēble diidz ga cxeel me guiaad lo guidzliu.

<sup>28</sup> Blozhse ga, wbire Mart zie Mart zietsedz Mart Marí. Bdziņ Mart zhliaanse bredz Mart Marí (sac nzian zha ne ndxie ga ziequiaabdiuzh Marí) rēb Mart: —Niinapaale blanso Maestro, na laa me rbeedz luu.

<sup>29</sup> Zigne bin Marí sca rēb Mart, briece nguzhooņ Marí laa Marí zie nēz co. <sup>30</sup> (Bdziņ Marí, laa Jesús bii zo zaatne güeydzieel Mart me ga; gase blēz me, bzēēbd me lad guiedz.) <sup>31</sup> Grē meņ Israel, zha ne ndxie lidz Marí ga ziechoobladz zdoo me, zeene gon zho sca lēēlēd briece me, nalaque zho zhits me; sac nan zho bod ro xpaa bzian me ziegoon me.

<sup>32</sup> Zigne bdziņ me zaatne zo Jesús ga, pquitsgzhib me lo Jesús.

—Jesús, luu ne nac luu meņ ne rnabey —rēb me—, telne niaca miņe nu no luu zeene blanguidz bzian naa, niete me.

<sup>33</sup> Psilo Marí roon Marí. Zeene gon Jesús, niicle Maríw, niicle grē zha Israel ne bdziņ ga, mban rac zho, grēse zho roon, dzigo ye me biab guieļnē me.

<sup>34</sup> Bnabdiidz me rēb me:

—¿Pa lo pqueets to me?

—Dē ganle —rēb zho—, zeena gan luu pa lo bgueets me.

<sup>35</sup> Hor co psilo Jesús biin me. <sup>36</sup> Grē zha Israel co, zeene gon zho roon me, rnechaa zho:

—¿Golwi ganle, blactaa nquialadz me Lazh!

<sup>37</sup> Laa zla zho rnee:

—Led me name beenguiac lo mgui ne rold lo ga, ¿pe nrieelod zha niun me, zeena nieta Lash?

### Brieaban Lash

<sup>38</sup> Zeene laa Jesús bdziñ ro baan Lash, biire biab guieñe me.

Zig nac tib bliee niaa baa co; rna tib quie nroob ntse zaatne rsëëb zho ngutoo;

<sup>39</sup> dzigo bnabey Jesús cob zho quie co.

Pquiab Mart, bzian ngutoo co rëb me:

—¡Mazd gdioobda! ¡Nadze rac tap ngbidz gut me, mbanle na rlaa me!

<sup>40</sup> Dzigo rëbchaa Jesús:

—Led laa naa nile lo luu, telne dib zdoo luu riladz luu naa, bii zan luu ganle zha nactaa grë ncuaañe ndzon ne run Dios.

<sup>41</sup> Zeene blozh bdoob zho quie co, dzigo blis Jesús lo me nëz gbaa, ni rëb me:

—Dios, luu ne nac luu Pxoz naa, xquizh xquieñzaac luu sac rquiaadiag luu mine rne naa. <sup>42</sup> Nan naa tibaque rquiaadiag luu mine rnee naa, per laa naa rzeta niina, zeena grëse miech ne ndxie nu gliladz zho ganle ne nli luu pxeel naa.

<sup>43</sup> Dzigo nguiedz bredz me, rëb me:

—¡Lash, brieec i!

<sup>44</sup> Zigne sca bnee me, laa ngutoo co brieec ga, scase nrieel lar dib nia me, dib ni me ne, ni nioog stib lë lar lo me. Dzigo rëb Jesús:

—¡Golxadz grë lar ne nrieel me i, zeena guey me!

### Rguib zho dieñ zha yгаа Jesús

(Mt. 26:1-5; Mr. 14:1-2; Lc. 22:1-2)

<sup>45</sup> Grë men Israel ne güeynal zhits Marí ga, zeene gon zho sca bleeban Jesús Lash, nzian zho bliladz ne nli Dios pxeel me. <sup>46</sup> Nogaa zho lel güey zho güeyzodiidz zho lo grë zha farisé zha bleeban me Lash. <sup>47</sup> Hor co lëälëd pcaalsa grë pxoz ne rnabey, ni grë zha farisé, rëb zho:

—¿Pe gnë to dieñ zha gaca? ¿Zha dziuun ne mgui ne rnee zho Jesús ga, sac gon pe zhidaa milagr ne quiayun me? <sup>48</sup> Telne squise csaan ne me, mbe grëse miech sëëb xnëz me; lozh ga, zeene gacnan men rnabey ne zob Romaw, laa me cxeel grë xmenguiib me guiaadnitlo zho xyadoo ne, guiaadnitlo zho ladz ne.

<sup>49</sup> Dzigo pquiab Caifás, men ne nac pxoz nroob len iz co, rëb me lo zho:

—¡Ni lal nu lëë peet riende to! <sup>50</sup> ¿Pe riende to mazd wena yгаа tib zha guet zho, zha quizh par gdib guiedz, lëdle grëse zha ladz ne nitlo?

<sup>51</sup> Zeene sca rëb Caifás men ne nac pxoz nroob ga, ga bzeet me ible no guet Jesús par csilaa me grëse miech lo dol; per led guicd me biaba, sinque Dios psiaaba guic me. Ga goquiet ne laa Jesús guet, par csilaa me grëse zha Israel, <sup>52</sup> ni grërագaa zha ne no dipse lo guidzliu, zeena tipse gac grëse zha ne nac xpëed Dios.

<sup>53</sup> Dzigo grëse zha ne nac wxtis ga, laa zho biaan diidz ne ible no yгаа Jesús gut zho me. <sup>54</sup> Nacne briedraa Jesús ne nenlo nian zho me; dzigo mazd laa

me brieenie no xtan zha Judé, güeynie me no zaatne wzhi no miech, bdziñ no tib guiedz win lë Efraín, ga bliaaz no grë no me.

<sup>55</sup>Leñ ngbidz co, ziaadyob lni Pascw. Nzian grë miech ne no grë guiedz las ne ndxie dib ga, laa zho rsilo quiariee zie zho nëz Jerusalén; sac ansraa csilo Pascw nzian zho rie yadoo run zho grëse miñe rnabey ley par guiaanmbe zho lo xtol zho. <sup>56</sup>Grëse zha ne rdziñ, leñ yadoo no zho rñabdiidzlsa zho dien pe zdziñ Jesús lo lni; sac grëse zho racladz gan me.

<sup>57</sup>Laa grë pxoz ne rnabey, ni grë zha farisé, laa zho bnabeyle, zha ne gantaa Jesús, tsienie zho diidz parne tsie zha ne tsienaaz me.

### Pchoob tib wnaa nceit nex guic Jesús

(Mt. 26:6-13; Mr. 14:3-9)

**12** Sxoop ngbidz gdziñ dze lni Pascwa, güey Jesús guiedz Betain, zaatne no Lazh, men ne bleeban me ga. <sup>2</sup>Sac grëse menlidz Lazh, beenlo zho tib xtsee, gownie zho me.

Mezh no zho, laga laa Lazh zobnie me, laa Mart nodziib ncuane gowxtsee zho lo mezh, <sup>3</sup>tibaque zeene bzëëb Marí bzëëbnie Marí tib lo nceit nex ne rriege guiee ne lë nard, tib lo nceit niazha, rgaaw maase grol boté. Zigne bdziñ Marí bdëëb Marí nceit co ni Jesús, blozh ga con guitsguic Marí pcuiidz Marí ni me. Dipse leñ yu zëbqlaa nceit co.

<sup>4</sup>Laa Judas Iscariot, tib zha ne nacgza no (zha ne bded ga pto me) zeene gon Judas sca bdëëb Marí nceit co ni Jesús, rneechaa Judas:

<sup>5</sup>—Mazd tebaa zha ndo nceit qui. Nguizhpaa zhow maase tson gayoo pes plat, dzigo needz zho dimi co ngaaza lo grë zha mban ne guiend pe yquiin.

<sup>6</sup>Sca rnee Judas, per nliid ne rquia zdoo Judas zha ne guiend pe yquiin, sinque laa Judas rguib dien zha cuan Judas dimi co, sac Judas ngotsow bziuud ne no dimi; zigse raclo dimi leñ bziuud co, zhlianse rbee Judas dimi co.

<sup>7</sup>Dzigo rëbchaa Jesús:

—Psaan me. Ib laa me bdëëb nceit qui ni naa, zeena nzhixcuale xcuerp naa gal dze ne laa naa ygueets. <sup>8</sup>Tejne racladz to gun to xyudar zha ne guiend pe yquiin, tibaque ranlsa to grë to zho, zac tsow ygad to lo zho; sangue naa zdziñ dze gandraa to naa.

<sup>9</sup>Ndal grë zha Israel, zeene bin zho laa Jesús no guiedz Betain, bio zho nëz güey zho lo me ga, ni güeyso zho lo Lazh, men ne bleeban me ga.

<sup>10</sup>Zeene gon grë pxoz rnabey cow, nacne bnediidzaque zho ye Lazh none gut zho; <sup>11</sup>sac por Lazh, nzian grë zha non, laa zho rbig nëz lo Jesús, laa zho riladz ne nli me nac Men ne zëëble diidz ga cxeel Dios.

### Bzëëb Jesús Jerusalén

(Mt. 21:1-11; Mr. 11:1-11; Lc. 19:28-40)

<sup>12</sup>Biini liu co, dipse lad guiedz Jerusalén zhoob diidz laa Jesús gdziñ ga dze co. Grë miech guizhiu ne bdziñ ga zie lni Pascw, <sup>13</sup>psilo zho brie zho

ziaad-xinèz zho me; tib tib zho nzhense zho tib lè zin. Lo guie|bley co, zeene gon zho me, psilo zho nguiedz roptsie zho, rnee zho:

—¡Zha men nroobtaa nac Dios! ¡Zha ndzontaa men rii pxeel Dios ziaad lo ne! ¡Lèè men rii gnabey Israel!

<sup>14</sup>Laa Jesús, zobse me lad tib burr yeen, zigne raquiet lo Xtiidz Dios zaatne rnee:

<sup>15</sup>Grèse to men Israel, gdziebde to.

¡Golwi ganle, laa men ne rnabey ladz to ziaad i, zobse me lad tib burr yeen!

<sup>16</sup>Grèse no ne nac no xpèèdscuel me, ni tib no biend hor co ne grèse ncuaaane noyac ga, raquietlew lo Xtiidz Dios; sinque haxta zeyle me gbaa, dzigoraa psoladz no nzian grè ncuaaane raquiet lo Xtiidz Dios ga, gonlo no goca; ni bien no Jesús raquiet ga.

<sup>17</sup>Lad grè miech guizhiu co no nzian zha ne gon zha bleeban me Lazh, dzigo nguiedz rzodiidz zhow lo grè miech co. <sup>18</sup>Ni nzian grè miech co, laa zho blanso ga ziaad-xinèz zho me, sac bin zho zha been me milagr nroob co. <sup>19</sup>Grè zha farisé, zeene gon zho grè miech guizhiu co, rneechaa zho:

—¡Pe zhidaa grè miech qui racnie men qui! ¡Peraa nadien dziuun ne!

### Rguib bla zha Gres Jesús

<sup>20</sup>Lad grè miech ne bdziñ Jerusalén ga, ziegan Dios len ngbidz Pascw co, lad co no blalaa zha zit ne nacd zha Israel, <sup>21</sup>dzigo bnee zho lo Lip (zha Betsaid nac Lip) rëb zho:

—Bzhiguiel bnè dien pa lo no Jesús, laa no racladz dzian no me.

<sup>22</sup>Dzigo güey Lip rëb Lipa lo Ndrés, blozh ga güey zho grop zho güeynie zho diidz lo Jesús.

<sup>23</sup>Dzigo rëbchaa me lo zho:

—Naa ne nac naa Mgui ne pxeel Dios, niinataa nagon laa dze bdziñ zeene laa naa gbire guia gbaa stib. <sup>24</sup>Golquiaadiaga ganle: Tib zhoxbtil, telne tsoda liu tibaque zho naca; per zeene laa zho co rio liu, nzian raca. Scaque naa nagon, none guet naa, none tsoliu naa, zeena gacnzian zha ne ygab xnèz naa.

<sup>25</sup>Sac zha ne rquia zdoo xquielmban, znitlonie zhow; sangue zha ne cueeladz xquielmban, zha cosi zgaa zho tib guielmban ndzon ne ib gdziñ dze lozh.

<sup>26</sup>Zha ne racladz sëeb xnèz naa, none gun zho mine rnabey naa; ni zaatne gdziñ naa yeque zho no gdziñ ga. Ni grèse zha ne sëeb xnèz naa ni gon zho xtidz naa, zunnon Pxoza naa zho.

<sup>27</sup>Mban rac zdoo naa niina. Per lèda ga gun naa, telne guiep naa lo Pxoza naa csilaa me naa lo grètaa guielnè ne no teed naa. ¡Sac par mincopaa zial naa lo guidzliu rii!

<sup>28</sup>‘Dios, luu ne nac luu Pxoza naa —rëb me—. Blu lo grè miech rii ganle ne men nroob nac luu.

Dzigo bin zho zëeb tib tsi men co gbaa, rëb me:

—Laaw blule naa, ni niina laa naa gbire gluw stib.

<sup>29</sup>Nzian grë miech ne ndxie ga, zeene bin zho tsi men co, bzhaac zho nguziw; zha ne bien led nguzida, rnee zho:

—Xanj̄l Dios ga gon̄ bnee lo me.

<sup>30</sup>Dzigo rëbchaa me lo zho:

—Laa to bin gan̄le laa Pxoꝝ naa bnee, ni por to gon̄ bnee me, zeena gon to tsi me ni gliladz to ne me pxeel̄ naa. <sup>31</sup>Laa dze nagon̄ bdziñ zeene laa Dios gun̄quizh naa xtoł grëse miech guidzliu rii; lëe dze bdziñ zeene laa mendox piche gnabeydraa ma lo guidzliu rii zigne rnabey ma niina. <sup>32</sup>Sac zeene laa naa quia glaa lo cruz, ga cuedz naa grëse miech zeena sëeb zho xnëz naa.

<sup>33</sup>Ga bzeet me zha gut miech me. <sup>34</sup>Grë miech ne ndxie ga, zeene bin zho sca rëb me, rëbchaa zho:

—¿Guet luu ye? Lo Xtiidz Dios name rnee, ib guete Men̄ ne cxeel̄ Dios ga. ¿Zha nac dzigo ne rnee luu laa luu guet? ¿Chopaa dzigo nac luu?

<sup>35</sup>Dzigo pquiab me rëb me lo zho:

—Naa nac zig tib biini ne noziini lo miech; ni ngabse dze ne cuëz naa lo to. Laga noziini naa lo to, golsëni zaatne riab biini zeena ygaade to guiel̄cow; sac zha ne rzë lo ncow riend̄ zho palo zie zho. <sup>36</sup>Niina ne rdeeda diidz golliladz cho nac naa, zeena gac to zha ne nlipaa no lo biini.

Blzhse sca rëb me laa me biche ga, blulodraa me lo zho. <sup>37</sup>Niicle gon̄lo zho nzian milagr ne been̄ me, per ib rililadz zho ne nli Dios pxeel̄ me. <sup>38</sup>Ni ib scalegaa no gaca, sac ga brieequia mine bzeet Isá (tib men̄ ne biadteed xtiidz Dios) zeene znu rëb me:

Dios, bui gan̄le ni tib choot nëd gliladz xtiidz luu,  
niicle ran̄ zho grëtaa milagr ne run̄ luu.

<sup>39</sup>Ni nligaa ib brieelod nliiladz zho me; sac zeene pquiaa Isá, znu rëb me:

<sup>40</sup>Ncow psan̄ Dios lo zho, ni been̄ndip me zdoo zho;

zeena gand̄ zho me, niicle guiend̄gaa zho zha gbig zho lo me csilaa me  
zho lo xtoł zho.

<sup>41</sup>Zeene znu bnee Isá, ible Jesús ga bzeet me; sac gon̄ me grëtaa guiel̄ndzon ne rap Jesús. <sup>42</sup>Ndal zho sca ib bliladz me, per noquegaa zha ne bliladz me; zig nac grë zha ne rnabey lo zha Israel, ndal zho bliladz ne nli Dios pxeel̄ me, per ib pxobnend̄ zhow; sac rdzieb zho cuee zha farisé zho yadoo. <sup>43</sup>Ni stiba, rdziladzraa zho guiaannon zho lo miech, laa ne guiaannon zho lo Dios.

<sup>44</sup>Len̄ dze co, tib vuelt nguiedz bnee Jesús, rëb me:

—¿Grëse zha ne rililadz naa, ye! Pxoꝝ naa ga rililadz zho! <sup>45</sup>¿Ni zeene rwi zho lo naa, ye! men̄ ne pxeel̄ naa ga ran̄ zho! <sup>46</sup>Naa nac zig tib biini ne rziini lo miech, ni grëse zha ne dib zdoo gliladz cho nac naa, zriee zho lo guiel̄cow ne no zho.

<sup>47</sup>Grëse zha ne gon Xtidz naa, ni gband zho zigne rnabeya, led naad gun̄quizh zho dol̄ co; sac ziald̄ naa par gdziibdol̄ naa miech, sinque laa naa zial̄ par csilaa naa zho lo dol̄. <sup>48</sup>Xtidz naa gac ley ne gun̄quizh zhow; zigtaa zhaw zigtagaa grë zha ne nëd gun̄bey naa, grë zha ne nëd yquiaadiag xtidz naa. <sup>49</sup>Sac grëse ncuanea pseed naa miech, led guicd naa biaba, sinque Pxoꝝ



naa meṅ ne pxeel naa, meṅ co rnabey naa pe nac miṅ cseed naa zho. <sup>50</sup>Ni nanpaa naa, grēse diidz ne rnabey Pxoꝝ naa naa rne naa, lëw rlu zha yгаа miech tib guielmban ndzon ne gdziṅd dze lozh; gacxe waa, grēse miṅ rnabey me gne naa, zigne racladz me scase rne naaw lo to.

### Rguiib Jesús ni xpëdscuel me

**13** Guieel ne rsilo lni Pascw; wdze co pcaalsanie Jesús no grēse no ne nac no xpëdscuel me, laa no nodiowxtsee. Rienle me ne gataa laa dze co bdziṅ, zeene laa me gbi lo guidzliu rii gbire me lo Pxoꝝ me stib. Grēse zha ne ngab lo me, rleynie me zho; ne nligaa rleynie me zho haxta bdeed me xquielmban me psilaa me zho. <sup>2-4</sup>Rien me grëtaa ncuaaṅe no, ladznia me psan Pxoꝝ mew; lo Pxoꝝ me brieem me ziaad me lo guidzliu, ni lo Pxoꝝ me gdziṅ me niina ne laa me gbi lo guidzliu.

Laa no zioob no no mezh, tibaque zeene guso me blee me lar ne mbix me, bdziṅlen me tib lë lar nool. Par hor co, laa mendox pquii-le Judas, zhin Simón Iscariot, parne tsieto Judas me. <sup>5</sup>Dzigo blaam me nis tib len bandej laa me psilo noguiib me ni grë zha ne nacgza no, zigse rlozh rguiib me ni tib zho scase scase rcuiidz mew con lar ne ndxie len me ga. <sup>6</sup>Zeene laa me zie quiiib me ni Simón Pedr, rëbchaa Simón lo me:

—jLëda i gon! ¿Pe nacne leḷ luu quiiib ni naa?

<sup>7</sup>Pquiab me rëb me:

—Grieelod guien luu niina, pe nacne quiiib naa ni luu; haxta tedraa nu dzigo ganle guien luuw.

<sup>8</sup>—jNend scaw! —rëb Pedr—. jPer naasi gon gnedzd naa diidz quiiib luu ni naa!

Dzigo rëbchaa me:

—Grieelod sca ygab luu xnëz naa, telne siguield luu quiiib naa ni luu.

<sup>9</sup>Hor co pquiab Simón, rëb Simón:

—Bzhiguiel sca, niinagazh bdiib ni naa, per led loxaque nidse naa, sinque dib nia naa, dib guic naa bdiib.

<sup>10</sup>Dzigo rëbchaa me:

—Zha ne gozle, nise zho riar; sac mbele zho. Scaque to nagon, mbele to grë to. Grë to rne naa, niicle ne led gzadpaa to mbe.

<sup>11</sup>Sca rëb me, sac rienle me cho tsieto me.

<sup>12</sup>Blozhse bdiib me ni no, wbiire wbix me xab co me, bzob me lo mezh; dzigo në me lo no:

—¿Pe bien to na pe nacne znu bdiib naa ni to? <sup>13</sup>Golwi ganle: To lëë, Maestro rnee to lo naa, ni rnee to naa nac meṅ rnabey; ni nonguiela gon, sac ne nligaa scaw. <sup>14</sup>Golgan sca, niicle ne maistr naa, niicle ne naa nac meṅ ne rnabey, per laa naa bdeed zig tib ngundziin win bdiib naa ni to. Nana sca, scaque golgac lo samiech to. <sup>15</sup>Laa naa blule lo to zha gun to, nana sca golt sienal min co.

<sup>16</sup>Gneli naa lo to ganle, lo grë zha ne nac ngundziin, tsod zha ne nonraa lo zha ne rnabey zho; scaque grë zha ne rie mandad, tsod zha ne nonraa lo

zha ne rxeel zho. <sup>17</sup>Laa to nanlew nasca. Gacxe waa, telne tsienal to wseed rii, zaacse gac lo xquielmban to.

<sup>18</sup>Golquiaadiag ganle, grëse mine none naa nu, led par grëde tow. Naa bzooblo to, nanween naa zha nac to tib tib to, ni nanween naa zha rnee lo Xtiidz Dios, rneew: “Lëëque tib zha ne rownie naa, griequia tsielo naa ladznia zha ne gut naa.” <sup>19</sup>Laaw rnegazh naa lo to niina, zeena zeene gaca, gliladz to ganle ne nli naa nac men ne rne naa nac naa. <sup>20</sup>Ni golgona ganle, grëse zha ne ycaania Espíritu Sant, men ne cxel naa, naale ga nocaania zho; ni zha ne rcaania naa, yele men ne pxeel naa ga rcaania zho.

### Rëb Jesús ne Judas nac zha ne tsieto me

(Mt. 26:20-25; Mr. 14:17-21; Lc. 22:21-23)

<sup>21</sup>Hor co psilo rlupaa mban goc zdoo Jesús, dzigo bneeli me lo no në me: —Gneli naa lo to ganle, lëëque tib to gon tsielo naa ladznia zha ne gut naa.

<sup>22</sup>Zeene bdzion no sca rnee me, psilo no rwilolsa no, rienḁ no dien cho nac zha ne rzeet me ga.

<sup>23</sup>Cuepaa me, ga zoob naa (rleynie me naa niicle ne raguialḁ naaw); <sup>24</sup>dzigo blunia Pedr lo naa, gnabdiidz naa lo me dien cho nac zha ne rzeet me ga.

<sup>25</sup>Nacne wbig gax naa, bnabdiidz naa lo me.

<sup>26</sup>Dzigo nëchaa me:

—Laa naa cobie tib lë quietxtil, ni lo zha ne gan luu gded naa quietxtil co, lëë zho ga.

Dzigo bzhen me tib lë quietxtil, blozhse bloobie me quietxtil co, laa me bdeeda lo Judas. <sup>27</sup>Zigne bnaaz Judas quietxtil co, laa mendox bzëëb zdoo Judas. Dzigo rëbchaa Jesús lo Judas:

—Mine no guic luu gun luu, na zeen nawdzegazh beena.

<sup>28-30</sup>Zigne blozh dow Judas quietxtil co, lëëlëd brieë Judas ley; pcowle liuw.

Lo grë no ne ziobnie no me lo mezh ga, ni tib no biend pe nacne sca rëb me lo Judas. No zho nan bod no pe ncuane rqiin lo lni co, rxeel me Judas tsiesi Judas, o nogaa pa tsiesan Judas palal dimi lo grë zha ne guiend pe yquiin; sac Judas nac zha ne ngotsow bziuud win ne no dimi.

<sup>31</sup>Gonse Jesús laa Judas brieë ley, dzigo nëchaa me lo no:

—Niina nagon bdzin dze zeene glu ganle zha nroobtaa guiendzon ne rap Mgui ne pxeel Dios, ni ga glu ganle pa lotaa nac guiendzon ne rap Dios. <sup>32</sup>Ni scaque Dios, zlu me ganle pa lotaa nac guiendzon ne rap Mgui ne pxeel me ga. <sup>33</sup>Xin yeena, zhile cuëz naa lo to nu! Squiguib to naa, per zigne rep naa lo grë zha Israel co, laaw rneque naa lo to niina: Grieelod sēnal to zaatne ga naa. <sup>34</sup>Gane laa naa rsan tib diidz cub rii, ni laa naa rnabey to gun tow: Tib tib to, golleynie zha ne nacgrë to, golgantsi zho. Zigne rleynie naa to, sca golleynie zho. <sup>35</sup>Zeene gan miech, ne nligaa dib zdoo to rleynie to samiech to, dzigo zien zho xpëëdsuel naa nac to.

**Ible ziaB Pedr runbeyd Pedr Jesús***(Mt. 26:31-35; Mr. 14:27-31; Lc. 22:31-34)*

<sup>36</sup>Dzigo bnabdiidz Pedr lo Jesús, rëb Pedr:

—Maestro, ¿pa dzigo nac zaatne tsie luu?

Dzigo rëbchaa me:

—Zaatne ga naa, grieelod sēnal luu niinagazh; per ib laa luu no guiaadnal.

<sup>37</sup>Pquiab Pedr, rëb Pedr:

—¿Per pe nacne grieelod sēnal naa zhits luu niina? ¡Sēnal naa zhits luu gon, niicxe maase gut zho naa waa!

<sup>38</sup>Dzigo rëbchaa me:

—¿Goon csaand luu naa ye Pedr, niicle gut zho luu? Nlid ga gon. Gneli naa lo luu ganle, zeene laa gall ycuudz tsonle vuilt rëb luu runbeyd luu naa.

**Niapse por Jesús gdziñ miech lo Dios**

**14** <sup>1</sup>Tsode to zhgab, tsode to guielñë. Tiblique golgun guic to, zigne dib zdo to rililadz to Dios, scaque dib zdo to golliladz cho nac naa.

<sup>2</sup>Golgonaa ganle: Zaatne nac lidz PxoZ naa, ndaldoo zaatne cuëz miech no ga, tel niaca mine guiend zaatne cuëz to, nile naaw lo to na. Gacxe waa, niina laa naa ga, gazhixcuaa naa zaatne cuëz to ga. <sup>3</sup>Ni zeene lozh gzhixcuaa naa zaatne cuëz to, hor co laa naa gbire guial stib, dzigosi laa to sēnal zhits naa; zeena tibaque zaatne gbiaaz ne. <sup>4</sup>Laa to nanle nasca pa lo ga naa, ni nanlegaa to nëz ne.

<sup>5</sup>Pquiab Mazh rëb Mazh lo me:

—Maestro, pelej nëz na gacndion no, ni per ni zaatne tsie luu ndiond no.

<sup>6</sup>Dzigo rëbchaa Jesús:

—Naa nac nëz co, naa rseed miech mine nac diidzli, ni naa rded tib guielmban ndzon ne ib gdziñd dze lozh. Lo grëse miech, zha ne gliladz cho nac naa, zha co gdziñ lo PxoZ naa; guiendraa stib mod ne gdziñ zho lo me.

<sup>7</sup>Telne runbey to naa, dzigo runbeyaue to PxoZ naa. Ni runbeylegaa to me, sac tibaque ran to me.

<sup>8</sup>Dzigo rëbchaa Lip lo me:

—Bzhiguiel mazd blu PxoZ luu lo no. Totsaque dzian no me, lëëlew ga dzigo.

<sup>9</sup>Pquiab Jesús, rëb me:

—Blactaale dze ga name Lip no naa lo to, ni gardaque ye gunbey luu naa. ¡Grëse zha ne ran naa, lëëque PxoZ naa ga ran zho! ¿Zha nac dzigo ne racladz luu glu naa me lo to? <sup>10</sup>¿Niacxe rililadzd luu dzigo ne tibaue nac no grop no PxoZ naa? Grëse mine rseed naa to, led guicd naa riaba; grëse ncuane run naa, me rnabeya, me runa sac tibaue nac no grop no me. <sup>11</sup>Golliladz sca ne tibaue nac no grop no PxoZ naa. Telne goon rililadzdga tow zigne rnee naa lo to nu, siquier lo grë dziin ne nodziuu no, ga golgan ganle ne nli tibaue nac no grop no me.

<sup>12</sup>Ne nligaa, gneli naa lo to ganle: Grëse zha ne riladz cho nac naa, ye zho zun zho grë milagr ne run naa, ni haxta nroobraa ncuaane gun zho; sac tel naa, laa naa no guia zaatne no Pxoza naa. <sup>13</sup>Ncuaane gnabtaa to lo Pxoza naa, totsaque glu to ne nli riladz to naa, zun naaw; zeena ga gan miech ganle me nac men ne mazdraa nroob, me nac men ne mazdraa non. <sup>14</sup>Ne nligaa, telne rnalo to naa, ncuaane gnabtaa to zun naaw.

### Sxeel Jesús Espiritu Sant

<sup>15</sup>Telne nli rleynie to naa, golgun grë mine rnabey naa to sca. <sup>16</sup>Scagaa naa, laa naa gnab lo Pxoza naa cxeel me tib men ne tibaque gacnieu to, tibaque cchoobladz zdoo to; ib gdzind dze ne csaan me to. ¡Lëe men co ga nac Espiritu Sant, men ne rlu pa min nac diidzli; ni ible sxeel Pxoza naa me! <sup>17</sup>Zha ne ngabd xnëz naa, grieelod ycaania zho me, sac rand zho me niicle runbeyd zho me; sangue to, runbey to me sac me quianap to niina, ni zbëzga me zdoo to.

<sup>18</sup>Ib csaanladz naa to, zbire naa guial naa lo to tib. <sup>19</sup>Nli zhilew, zeene gandraa grë miech naa, sangue to gon bii zan to naa; sac zriebaana naa, ni scaquega to zga to tib guielmban ndzon ne gdzind dze lozh. <sup>20</sup>Gal dze co, zeene gan to laa naa grieeban, ga gliladz to ganle ne nli tibaque nac no grop no Pxoza naa, zigne tibaque nacie naa to ni naciega to naa. <sup>21</sup>Zha ne runbey zha nac grë mine rnabey naa, ni rban zhow zigne naca, ga rlu ne nli rleynie zho naa; ni zigne rleynie zho naa, scaque Pxoza naa zleynie me zho; niicle naagaaw zleynie naa zho, ni zlu naa lo zho ganle cho nac naa.

<sup>22</sup>Dzigo pquiab Judas (zhaa Judas Iscariot), rëb Judas lo me:

—¿Pe nac waa lose no glu luu cho nac luu? ¿Telzhe grëraa miech waa?

<sup>23</sup>Pquiab me rëb me:

—Zha ne run mine rnabey naa, lo zha co glu naa cho nac naa; sac rlu zho ne nli rleynie zho naa. Ni haxta ziaad no grop no Pxoza naa gbannie no zho; sac zigne rleynie zho naa, scaque zleynie me zho. <sup>24</sup>Sangu zha ne rund mine rnabey naa, ¿zha dien glu naa lo zho cho nac naa? Sac rlu rleynie zho naa. Golsoladz ganle, grëse diidz ne ron to rne naa, led guicd naa riaba, xtiidz Pxoza naaw. <sup>25</sup>Laa naa rne grë min rii, laga bii zo naa lo to nu, <sup>26</sup>per zeene laa Pxoza naa cxeel Espiritu Sant men ne guiaad cchoobladz zdoo to (men co guiaad xcuent naa), men co lozh cseed to, ni guncsoladz me to grëse mine bne naa lo to.

<sup>27</sup>Laa naa guia, per laa naa rasan tib guielbley zdoo to, zeena zigne tibliladz rac zdoo naa, scaque tibliladz gac zdoo to. Sac guielbley ne rnedz naa lo to nu, nacda zig nac guielbley ne runbey grëraa miech guidzliu rii. Tsoode to zhgab sca, niicle gdziebde to. <sup>28</sup>Laa to binle ganle, laa naa no guia lo Pxoza naa per zbire naa guial naa lo to tib. Telne nli rleynie to naa ine nley golgac, niina ne ron to laa naa guia lo me, sac gon men nroobraa nac me lo naa. <sup>29</sup>Laa naa rne grë min rii lo to niina, zeena zeene gaca, ga lozh guien to ganle cho nac naa.

<sup>30</sup>Led nroobdraa sodiidznie naa to, sac ile ziaad mendox, men ne rnabey lo guidzliu rii. Peet grieelod gun mendox naa, <sup>31</sup>per ible none gon naa xtiidz

Pxoz naa men ne pxeel naa, zeena gan miech ganle ne nli rleynie naa me. ¡Goltsieso nasca, zeena zio ne!

### Jesús nac zig tib lbë uv

**15** <sup>1</sup>Naa nac zig tib zhan lbë uv, laa to nac zhicwa, laa Pxoz naa nac zig tib zha ne quianapa. <sup>2</sup>Grëse zhicw lbë co mine rquiad nex lo, rchug mew; laa grë mine rquia nex lo, ine rsanmbe me low, rbelaan me low zeena rquiaraa nex low.

<sup>3</sup>Zig nac to gon, laa Dios psanmbele to sacne zianał to grë xtidz naa mine pseed naa to. <sup>4</sup>Gbichede to lo naa sca, sinque tibaque golgacnie naa zigne nacie naa to. Golgan ganle, zig nac tib zhicw lbë uv, peet nex grielod yquia low telne tibnëzle nixa; scaquegaa to nagon, grielod gun to grë ncuane rdziladz naa, telne nacie to naa. <sup>5</sup>Golsoladz ganle: Naa nac zig nac lbë co, laa to nac zhicwa. Zha ne tibaque gacnie naa, grëse ncuane gun zho zdziladz Diosa; <sup>6</sup>sac tel piche zho lo naa, laa zho nacle zig tib zhicw lbë co mine nixle tib nëz, laaw nixle ga, ga gbidza; lozh ga laaw tsec. <sup>7</sup>Telne tibaque gacnie to naa, ni tibaque tsoxco to grë mine pseed naa to, dzigosi ncuane gacladztāa to gōlnaba, ni scagaa scaania tow.

<sup>8</sup>Gollu sca ne nli xpëëdsuel naa nac to, golsannon Pxoz naa, niapse ncuane rdziladz me min co golgun.

<sup>9</sup>Ne nligaa rleyniedox naa to. Golwi ganle, zigne rleynie Pxoz naa naa, scaque rleynie naa to. Golguien sca tibaque golgun mine rnabey naa. <sup>10</sup>Sac gon, zha ne gun mine rnabey naa, gzataa dze zleynie naa zho; sac sca rleynie Pxoz naa naa ne run naa mine rnabey me. <sup>11</sup>Laa naa rzet min rii lo to, zeena guiaad tib guiebley zdoō to. Ne nligaa, zeena guiaad tib guiebley nroob zdoō to; ni naa gnedz guiebley co lo to.

<sup>12</sup>Laa naa rnabey to, laa naa rnab lo to: ¡Golleynie samiech to, zigne rleynie naa to! Tel naa, golguien ganle pa lotaa rleynie naa to, <sup>13</sup>sac led lega gdeedse tib zha xquielmban zho par csilaa zho samiech zho, sinque ga rlu zho ganle pa lotaa rleynie zho zho.

<sup>14</sup>Ni to gon, telne gon to grë mine rne naa lo to, dzigosi nli rleynie to naa. <sup>15</sup>Led yedraa niina nac to zig tib ngundziin, sac zha ne nac ngundziin nand zho pe run men ne rnabey zho. Ne nligaa rleynie naa to, sac grëse mine rnabey Pxoz naa, grëse zigne rnee me, laaw bzodiidzle naa lo to. <sup>16</sup>Golguien ganle, led tod gon bzooblo naa, sinque, jnaa bzooblo to! Ni laa naa bzooblo to zeena gun to niapse ncuane rdziladz Dios; dzigosi ncuane gnabtaa to lo Pxoz naa, ne nac to zha ne no xnëz naa, zneedz mew. <sup>17</sup>Laa naa rso diidz lo to: Golleynie samiech to. <sup>18</sup>Niicle rlëë zho ran zho to, golsoladz ganle, desde naa squi rlëë zho ran zho. <sup>19</sup>Rlëë zho ran zho to, sac laa naa bleele to lad zho, zianałdraa to ncuane rleynie zho; laa telne nagon bii nac to zigne nac zho, dzigosi zëëb gleynie zho to. <sup>20</sup>Golsoladz ganle, zeene znu ni naa lo to: ¡Tsođ ngundziin ne ndziibsrāa non lo zha ne rnabey zho! Tel naa, pquianał miech naa, ¿pe lel to dzigo gandze zho?

Nana, zigne brieequiagaa palal zha ne bliladz xtidz naa, scaque zrieequia zha ne yquiaadiag mine gnee to.

<sup>21</sup>Ible squiana<sub>l</sub> miech to ne nac to zha ne ngab xnëz naa, sac runbeyd zho Dios men<sub>n</sub> ne pxeel<sub>n</sub> naa. <sup>22</sup>Tel<sub>n</sub> niaca mine niald naa, niicle ned naa lo zho, zac guiab ne peet xtold zho, sac riend zho pe run zho. Per na gon, guiend pe yquiaaqui zho; sac bial<sub>n</sub> naa bne naa lo zho. <sup>23</sup>Zha ne rlëë ran zho naa, yele Pxo<sub>z</sub> naa ga rlëënie zho. <sup>24</sup>Ne nligaa telne niaca mine niand zho grëtaa milagr nroob ne run naa, zac guiep naa peet xtold zho; per na gon, blactaa milagr ne gon zho ben<sub>n</sub> naa, ni laa zho bii rlëë ran zho no grop no Pxo<sub>z</sub> naa. <sup>25</sup>I nagon norieequia mine raquiet lo Xtiidz Dios, zaatne znu rnee: “Peet guielntseeb quiyund naa lo zho, per rlëënie zho naa.”

<sup>26</sup>Laa naa nile lo to ganle, ible sxel<sub>n</sub> naa Espíritu Sant gacnie to, niapse diidzli rnee me. Lo Pxo<sub>z</sub> naa griee me guiaad me, me cchoobladz zdoo to, ni me gneedz guielbiini lo to lozh guien to cho nac naa. <sup>27</sup>Ni scagaa to, ye to laa to none sodiidz lo grëraa miech gacnan zho cho nac naa; sac gon tibaque bzënie to naa desde ne psilo naa xtsin naa.

**16** <sup>1</sup>Laa naa rne grë min<sub>n</sub> rii lo to zeena peet tsienied guic to, tibaque dib zdoo to gnalo to naa. <sup>2</sup>Sac gon zuncxo<sub>on</sub> zho to, zbee zho to yadoo; ni zdzin dze haxta zut zho to, sac masaque sac zho lëë mine racladz Dios ga noyun zho. <sup>3</sup>Laa zho gun grë min<sub>n</sub> co, sac niicle Pxo<sub>z</sub> naaw, niiclegaa naaw, runbeyd zho no.

<sup>4</sup>Laa naa rzodiidz grë min<sub>n</sub> rii niina, zeena zeene gal<sub>n</sub> dze ne laaw noyac, csoladz to ganle grësew bzodiidzle naaw lo to. Bzodiidzd naaw lo to glo, sacne hor co laa naa bii zo lo to. <sup>5</sup>Laa niina nagon laa naa gbiche lo to, laa naa gbire guia lo men<sub>n</sub> ne pxeel<sub>n</sub> naa, per ran naa ni tib to zienied guic gnabdiidz dien pa nac zaatne ga naa, dien pe nacgaa ne laa naa ga. <sup>6</sup>Lëë gdib mine run to, riab guielnë to ron to grë mine rne naa nu.

<sup>7</sup>Gneli naa lo to ganle: Mazd wen gon tsie to zeene laa naa guia lo men<sub>n</sub> ne pxeel<sub>n</sub> naa, sac telne cuëz naa nu, grielod guiaad men<sub>n</sub> ne guiadchoobladz zdoo to ga. Sangue telne guia naa, dzigo naazhal cxel<sub>n</sub> me. <sup>8</sup>Ni zeene laa me guiaad, me gunquien<sub>n</sub> miech ganle grëse zho zha ngoopdol<sub>n</sub> nac zho, me gunquien<sub>n</sub> zho zha laa zho lo dol<sub>n</sub> co guiaanwen zho lo Dios, ni guien<sub>n</sub> zho ne nli zdzin tib dze zeene laa Dios gun<sub>n</sub> xquielwxtis me.

<sup>9</sup>’Pe nacne nac zho miech ngoopdol<sub>n</sub>? Miech ngoopdol<sub>n</sub> nac zho, sacne riladzd zho cho nac naa. <sup>10</sup>¿Zha grielo laa zho lo dol<sub>n</sub> co guiaanwen zho lo Dios? Zrielow, mincocxe waa nacne bial<sub>n</sub> naa, ni na laa naa guia zaatne zob Pxo<sub>z</sub> naa, gandraa to naa. <sup>11</sup>¿Zha rlu ne nli zun Dios guielwxtis? Nli zun mew, sac gon laa me bnabeyle zha nac grë guielnë dox ne ygaa mendox, men<sub>n</sub> ne quianabey lo guidzliu rii.

<sup>12</sup>¿Nzianraa ncuane racladz naa sodiidz naa lo to! Per rien<sub>n</sub> naa grielod tsoguc to zha naca niina. <sup>13</sup>Zeene guiaad Espíritu Sant, me gneedz guielbiini lo to guien to grëraa ncuane no gacnan to, ni grëgaa ncuane naraa gac. Niapse diidzli gnee me, sac led guicd me guiab grë mine gnee me, sinque mine

nac xtiidz Pxo<sup>z</sup> naa, mi<sup>n</sup> co gnee me. <sup>14</sup>Ga glu me lo miech gan<sup>le</sup> ne nli me<sup>n</sup> nroob, me<sup>n</sup> non nac naa. <sup>15</sup>Rne naa ga glu me, sac grê<sup>ta</sup>a ncuaa<sup>ne</sup> rnabey Pxo<sup>z</sup> naa, yeque naa rnabeya. <sup>16</sup>Zhilew ze<sup>ne</sup> laa naa gbiche lo to gan<sup>dra</sup>a to naa; per gacdaquew xtse ze<sup>ne</sup> laa to gbiirelaque gan<sup>u</sup> naa stib.

<sup>17-18</sup>Ze<sup>ne</sup> bdzion no sca rnee me, blalaa no psilo no rnabdiidzlsa no rnee no:  
—¿Bay zha nacne squi rnee me? ¿Zha nacne rnee me, zhilew dziandraa ne me, per gacdaquew xtse laa ne dzian<sup>la</sup>que lo me stib? Ni rneeque me laa me guey lo Pxo<sup>z</sup> me.

<sup>19</sup>Bien me racladz no gnabdiidz no lo me, dzigo nê me lo no:

—¿Racladz to lëe gacna<sup>n</sup> to zha nacne znu rne naa? <sup>20</sup>Gol<sup>quia</sup>adiaga sca gan<sup>le</sup>: Ze<sup>ne</sup> gdzi<sup>n</sup> dze co, laga noyoon to no to gui<sup>l</sup>nê ne laa naa biche lo to, laa grê<sup>ra</sup>a miech haxta zley zho ne laa naa wbiche lo zho. Nli nroob gui<sup>l</sup>nê ne tso to, per ze<sup>ne</sup> laa to gan<sup>u</sup> naa stib, gui<sup>l</sup>bley nroob ne tso to. <sup>21</sup>Nac cuent rii zig rzac tib me<sup>n</sup> wnaa ne ral xpëêd. Glo yoob ro, yoob dox ne rquia me, per deque laa mëêd co ralse, ni rsoladzdraa me yoob co; sac mazdraa nroob nac gui<sup>l</sup>bley ne rio me ran<sup>u</sup> me laa xpëêd me blanso lo guidzliu. <sup>22</sup>Scadaa nagon<sup>u</sup> rzac to, nli mban rac to niina, per ze<sup>ne</sup> laa to gan<sup>u</sup> naa stib, dzigosi tib gui<sup>l</sup>bley nroob ne tso to, ni choot grielod ctiche gui<sup>l</sup>bley co lo to.

<sup>23</sup>'Ze<sup>ne</sup> gal<sup>u</sup> dze co, yquiindraa to pe gnabdiidz to lo naa. Ncuaa<sup>ne</sup> gnab<sup>ta</sup>a to, lo Pxo<sup>z</sup> naa gnab tow, ni zneedz mew, sac xnêz naa ngab to. <sup>24</sup>Haxta lo nadze peet gard gnab to, niicle ne xnêz naa ngab to; laa niina laa naa rne lo to ncuaa<sup>ne</sup> rquiin to gol<sup>n</sup>aba lo me, ni ible zneedz mew gon<sup>u</sup>. Nroob gui<sup>l</sup>bley ne tso to hor co. <sup>25</sup>Nzian grê<sup>e</sup> ncuaa<sup>ne</sup> zine naa lo to, rned naaw clar; per laa dze bdzi<sup>n</sup> ze<sup>ne</sup> grê<sup>se</sup> ncuaa<sup>ne</sup> gne naa, clar gne naaw lo to, zig nac ze<sup>ne</sup> gzet naa Pxo<sup>z</sup> naa. <sup>26</sup>Ni zig nile naa ga, hor cosi ncuaa<sup>ne</sup> gnab<sup>ta</sup>a to lo me, zneedz mew, sac xnêz naa ngab to. Yquiindpaa gne naa lo me gneedz me ncuaa<sup>ne</sup> gnab to lo me, <sup>27</sup>sac ye me rleynie me to. Rleynie me to, sac gon<sup>u</sup> rleynie to naa ni rliladz to ne nli lo me brie naa bial<sup>u</sup> naa lo guidzliu. <sup>28</sup>Ni nligaa, lo me brie naa bial<sup>u</sup> naa lo guidzliu; ni niina ne laa naa gbi, loque me gdzi<sup>n</sup> naa.

<sup>29</sup>Dzigo rdzieets no lo me:

—¡Nasi nagon<sup>u</sup> rien<sup>u</sup> no zha rnee luu! Sac clar rnee luu, rneedraa luu zigne rnee luu glo. <sup>30</sup>Nasi rien<sup>u</sup> no grê<sup>se</sup> ncuaa<sup>ne</sup> nan<sup>u</sup> luu, sac zig nac niina pquiindpaa nabdiidz no lo luu. Gacxe waa, nasi nagon<sup>u</sup> rliladz no ne nli lo Dios brie luu.

<sup>31</sup>Pquiab me, nê me:

—¡Wen ga tel<sup>ne</sup> rliladz to niina cho nac naa! <sup>32</sup>Per lëe hor co nagon<sup>u</sup> bdzi<sup>n</sup>; ni niina, grê<sup>se</sup> to laa to csaan naa, tib tib to zhaase zhaase nêz ne xen<sup>u</sup> to. Per guia<sup>and</sup> naa loxaque naase, sac tibaque nacie Pxo<sup>z</sup> naa naa. <sup>33</sup>Grê<sup>se</sup> ncuaa<sup>ne</sup> bne naa lo to nu, laaw bne naa ze<sup>ne</sup>a peet tsienied guic to, ben<sup>que</sup> nan<sup>le</sup> to gan<sup>le</sup> tibaque nacie naa to. Parga nli, laga no to lo guidzliu rii, nzian grê<sup>e</sup> gui<sup>l</sup>nê ne ted to, per gdziebde to; sac gon<sup>u</sup> naa rnabey, ladznia naa no grê<sup>ta</sup>a ncuaa<sup>ne</sup> no lo guidzliu.

Rnab Jesús gacniēn Dios xpëēdsuel me

**17** Blozhse sca nē me lo no, blis lo me bui me nēz gbaa.

—Dios, luu ne nac luu Pxo<sup>z</sup> naa —rēb me—, niina nagon laa dze co bdzi<sup>n</sup>. Blu ganle men nroob nac naa ne nac naa Xpëēd luu, zeena ga glu naa lo miech ganle pa lotaa men nroob nac luu. <sup>2</sup>Zigne psan luu grēse miech ladznia naa, ni gdeed naa tib guielmban ndzon ne gdzi<sup>nd</sup> dze lozh lo grēse zha ne bneedz luu ngab xnēz naa; scaque niina blu ganle men nroob nac naa. <sup>3</sup>Lēē guielmban co ygaa grēse zha ne gunbey luu, ne nli luuse nac Dios nguia mban, ni guien zho cho nac naa, ne pxeel luu naa bial naa lo guidzliu rii.

<sup>4</sup>Grēse ncuaa<sup>ne</sup> bnabey luu naa, laaw noyu<sup>n</sup> naa; ni ga rlu naa lo grē miech rii ganle pa lotaa men nroob nac luu. <sup>5</sup>Scagaa luu ne nac luu Pxo<sup>z</sup> naa, niina ne laa naa glanso lo luu, blu ganle men nroob nac naa; sac desde mazd glo zeene gard tsa<sup>a</sup> grētaa ncuaa<sup>ne</sup> no, tibaque nac lo guielndzon ne bdzio ne haxta dze ne blanso naa lo guidzliu rii.

<sup>6</sup>Grēse zha ne ble luu lad grē miech rii bneedz luu lo naa, laa naa pseed zho gunbey zho luu; ni scagaa zha, bliladz zho xtiidz luu. Chen luu zho per laa luu bneedz zho lo naa. <sup>7</sup>Zig nac niina, grēse ncuaa<sup>ne</sup> bneedz luu lo naa, nanle zho ne luu bneedza, <sup>8</sup>sac pseed naa zho grēse wseed ne bneedz luu lo naa, ni bliladz zhow. Wen wen gocnan zho ne lo luu i brie naa zial naa lo guidzliu rii, ni rililadz zho ne luu pxeel naa.

<sup>9</sup>Laa naa rnab lo luu gacniēn luu zho. Rnabd naa par grēse miech guidzliu rii, sinque laa naa rnab por grē zha ne bneedz luu lo naa; sac gon chen luu zho, <sup>10</sup>ni zha glu ganle pa lotaa men nroob nac naa. Grēse zho chen luu zho; sac grēse ncuaa<sup>ne</sup> nacchen naa, chen luuw; ni grēsegaa ncuaa<sup>ne</sup> nacchen luu, chen naaw.

<sup>11</sup>Rien naa, led nroobdraa cuēz naa lo guidzliu rii, laa naa gbile guial naa lo luu i; per zha, laa zho guiaanaque nu. Gane niina, luu ne nac luu Pxo<sup>z</sup> naa, luu ne nac luu tib men ne guien<sup>d</sup> xtol, laa naa rnab lo luu: pquianap zho ne nac zho zha ne bneedz luu lo naa, zeena ni tib zho nitlod, sinque tibaque gac zho gza zho zigne tibaque nacne grop ne. <sup>12</sup>Len dze ne blēz naa lo zho nu, zigne racladz luu sca pquianaap naa zho. Ni scagaa ni tib zho bnitlod; zha ne bnitlo ga, nole ne sca nitlo zho, zeena sca grieequia mine raquiet lo Xtiidz luu.

<sup>13</sup>Zhilew laa naa glanso zaatne no luu i; per len dze ne blēz naa lo zho nu, nzian grē ncuaa<sup>ne</sup> bne naa lo zho, zeena ye zho tso guielbley nroob ne no naa. <sup>14</sup>Pseed naa zho mine nac xtiidz luu; per na rlēē grēraa miech ran zho zho, sacne zienaldraa zho grē ncuaa<sup>ne</sup> ndzinlid ne rac lo guidzliu rii. Nac zho zigne nac naa, rley<sup>n</sup>ied naa grē ncuaa<sup>n</sup> co. <sup>15</sup>Per rnabd naa cuee luu zho lo guidzliu rii, sinque laa naa rnab csaand luu gun zho ncuaa<sup>ne</sup> racladz mendox. <sup>16</sup>Sac niicle zhaw, niicle naaw, choot zionald grē ncuaa<sup>ne</sup> ndzinlid ne rac lo guidzliu rii.

<sup>17</sup>Bzhiguie<sup>l</sup> sca bdeed guie<sup>l</sup>biini lo zho guien zho zha nac Xtiidz luu, sac Xtiidz luu nac diidzli; zeena dib zdo<sup>o</sup> zho tsoxco zho gban zho zigne rnabey



luu. <sup>18</sup>Sac gon, niina laa naa rxel zho lo grëraa miech guidzliu rii, zigne ne pxeelaque luu naa. <sup>19</sup>Ni niina, dib zdoo naa laa naa gun miñe rnabey luu, zeena ye zho guien zho none dib zdoo zho gun zho miñe rnabey luu.

### Rnab Jesús por grë zha ne yabraa xnëz me

<sup>20</sup>Laa naa rnab gacniën luu zho, ni gacniën luu zha ne naraa gliladz naa, zeene laa zho tsieseed zho; <sup>21</sup>zeena tibaque gac zho, zigne tibaque nac ne grop ne. Ni scaquegaa gacnie zho ne, zeena gliladz grëraa miech ganle ne nli luu pxeel naa. <sup>22</sup>Laa naa psannon zho zigne psannonaque luu naa, ni tipse gac zho zigne tibaque nac ne grop ne. <sup>23</sup>Zigne nacie luu naa, scaque nacie naa zho. Bzhiguiel gocniën zho, tibaque gac zho grëse zho, zeena gan grëraa miech ganle ne nli luu pxeel naa, ni guien zho ganle zigne rleynie luu naa, scaque tibaque rleynie luu grëse zha ne ngab lo naa.

<sup>24</sup>Papá, grëse zha ne bneedz luu lo naa nu, racladz naa ye zho guiaad zaatne glanso naa i, zeena gan zho lo grëtaa guielndzon ne no naa. Lo guielndzon ne bneedz luu lo naa, sac rleynietaque luu naa haxta zeene gard tsaá guidzliu.

<sup>25</sup>Papá, luuse nac men ne rapd ni tib dol, niicle ne runbeyd grë miech rii luu, sangue naa runbey naa luu; ni scaquegaa grë zha ne bneedz luu lo naa nu, nanle zho ne luu pxeel naa. <sup>26</sup>Laa naa pseedle zho gocnan zho cho nac luu ni bii seedragaa naa zho, guien zho ganle pa lotaa rleynie luu naa; zeena scaque guien zho gleynie zho samiech zho, ni gacnie zho naa.

### Bnaaz zho Jesús

(Mt. 26:47-58; Mr. 14:43-50, 53-54; Lc. 22:47-54)

**18** Zeene blozh bnaab Jesús lo Dios, laa me brienie no ga bdieedquia no nëz dan ro psë ne rnee zho Psë Cedrón. Ga no tib zaatne zëëb niapse yag nex, dzigo ga bliiaz no gza no me.

<sup>2</sup>Judas zha ne pto me ga, wen wen runbey Judas lugar co, sac nzian vuelt ziyenie me no ga. <sup>3</sup>Dzigo zeene laa Judas blanso ga, laa Judas blansoniele tib dzoon menguiib, ni zla zha ne rquianap yadoo; no guierbel nia zho blanso zho ga, zha ne nzhen yag, zha ne nzhengaa spad. (Lëë grë zha co pxeel grë pxoz rnabey, ni grë zha farisé.) <sup>4</sup>Loxaque blanso zho, laa Jesús brieequiale, rëb me lo zho:

—¿Cho rguib to?

Sca rëb me sac rienle me pe nacne zie zho ga, nanle me pe nac grëtaa ncuaañe ted me.

<sup>5</sup>Pquiab zho, rëb zho:

—Men Nazaret ne lë Jesús, men co ziaadguib no.

Dzigo rëb me:

—Naa nac men co, tel me ziaadguib to.

<sup>6</sup>Zeene bin zho rëb me: “Naa nac men co”, wbire rzhitsaque zho, grëse zho biab liu. Ye Judas no lad co. <sup>7</sup>Wbiire Jesús bnaabdiidz me lo zho, rëb me:

—¿Cho zho rguib to?

Pquiab zho rëb zho:

—Men Nazaret ne lë Jesús, men co rguib no.

<sup>8</sup>—Laa naa nile lo to —rëb me—. Naa nac men co. Telne naa ziaadguib to, golsaan sca guey grë zha ne zo lo naa nu.

<sup>9</sup>Ga briequia xtiidz me zeene rëb me: “Lo grë zha ne bneedz luu lo naa, ni tib zho bnitlod.”

<sup>10</sup>Laa Simón ney tib spad, hor co bdobaque Simón spad co psilaa me tib niaw, bliengaa me diag derech tib mgui lë Malcw. (Lëë mgui co quia xtsiin men ne nac pxoz nroob.) <sup>11</sup>Zeene gon Jesús, rëbchaa me:

—¡Blootsow spad qui Pedr! ¡Bien ganle Pxoza naa rnabey znu teed naa! ¿Niacxe gond naa miñe rnabey me naa dzigo?

<sup>12</sup>Hor co laa grë menguiib co, grë zho zha ne rnabey lo zho, ni grë zha ne rquianap yadoo ga, laa zho wbigbe bnaaz zho me. Blozhse bzobdoo zho me, laa zho zienie me.

<sup>13</sup>Sca nzobdoo me, laa zho bdziñnie me lidz men ne lë Anás, pxozdzoop Caifás. Caifás nac pxoz nroob len iz co, <sup>14</sup>ni me ga rëb lo grë men non lo zha Israel, ne mazd wena tibaque zha ne yгаа guet, quizh zho par dib guiedz.

### Rëb Pedr runbeyd Pedr Jesús

(Mt. 26:69-70; Mr. 14:66-68; Lc. 22:55-57)

<sup>15</sup>Zhiits co, ga nal no grop no Pedr. Ni ne runbey naa Caifás men ne nac pxoz nroob ga, zeene bdziñ no ro lidz Anás, loxaque naa brieelo bzëëb nëz ley. <sup>16</sup>Laa Pedr, zaatne nactaa ro yu par gdziñ zaatne nac ley, gataa biaan Pedr. Nacne brieque naa bnee naa lo wnaa ne zonap ro yu, dzigoraa bdeed wnaa co diidz bzëëb Pedr. <sup>17</sup>Dzigo rëbchaa me lo Pedr:

—¿Bod ye luu dzigo lëë nac xpëedscuel men ne bdziñnie zho i?

—Coo, led yed naa —rëb Pedr.

<sup>18</sup>Grë zha ne quia xtsiin men co ni grë menguiib ne ndxie ga, laa zho bzëëgle gui. Grëse zho, laa zho ndxiedzë lo gui ga, sac rac nal. Ye Pedr bdziñ lo zho ga nodzëë Pedr.

### Rquiep Anás Jesús

(Mt. 26:59-66; Mr. 14:55-64; Lc. 22:66-71)

<sup>19</sup>Laa nëz len yu, laa Anás psilo noquiep Jesús dien yo grë xpëedscuel me, ni dien pe nac grë wseed ne nolu me lo miech. <sup>20</sup>Dzigo pquiab Jesús, rëb me:

—Grëse miech, nanwen zho ganle pe nac zhiwseed naa. Sac zeene pseed naa zho, bend naa ne ngeets zhlian nseed naa zho; sinque zaatne rcaalsa nzian miech, ga bne naa lo zho. No hor pseed naa zho len grë yadoo win, nogaa hor pseed naa zho len yadoo nroob ne zob lad guiedz nu. <sup>21</sup>Nana bod riegualda ne lo naa rnabdiidz luu. Mazd lo grë zha co ganle bnabdiidz, zha bin grëtaa ncuane bne naa.

<sup>22</sup>Loxaque blozh sca pquiab Jesús, zeene bias tib menguiib ne rquianap yadoo zo gax ga, bdap me lo Jesús.

—¡Bien ganle! —rëb me—. ¡Led squid gon none yquiab luu lo men ne nac pxoz nroob!

<sup>23</sup>Dzigo rëbchaa Jesús:

—Telne rzac luu ben naa falt, bnë dien pe nac diidz ne pxin naa. ¿Te wal rdziladz luu ye, rguin luu zha ne rnee diidzli?

<sup>24</sup>Blozh ga scaque nzobdoo Jesús pxeel Anás me lo Caifás, men ne nac pxoz nroob.

### Rnee Pedr stib runbeyd Pedr Jesús

(Mt. 26:71-75; Mr. 14:69-72; Lc. 22:58-62)

<sup>25</sup>Hor co laa Pedr bii zodzëëque lo gui nëz ley. Dzigo wbiire zho bnaabdiidz zho lo Pedr, rëb zho:

—¿Bod xpëedscuel men ne blansonie zho i lëë nac luu?

Laane neeli Pedr, lel pquiab Pedr rëb Pedr:

—¡Lëda! ¡Zha gaczhe naa xpëedscuel men qui!

<sup>26</sup>Ye tib zhalidz Malcw, zha ne pchug Pedr diag ga, laa zho zodzëë lo gui ga, sac ye zho quia xtsiin pxoz nroob co; dzigo rëbchaa zho:

—Ni gon naa name, ye luu no lad zha ne zonie me len yag oliv ga.

<sup>27</sup>Wbiire Pedr rëb Pedr runbeyd Pedr me, ni lëëtaque hor co laa tib gall pcedz.

### Güeynie zho Jesús lo Pilat

(Mt. 27:1-2, 11-14; Mr. 15:1-5; Lc. 23:1-5)

<sup>28</sup>Ziadyiinile liuw, zeene laa zho brieenie Jesús lidz Caifás, zienie zho me zaatne nac xyulow Pilat, men ne nac gobernador. Zeene bdziñ zho, ni tib zho bzëëbd len yulow, sac racladzd zho quiits zho mine rnabey xley lay zho; parne grieelo yquiin zho guielwagw ne row zho lni Pascw co. <sup>29</sup>Nacne briece Pilat bnaabdiidz Pilat lo zho, rëb Pilat:

—¿Pe nacne ziaadnie to men qui nu? ¿Pe rquiaqui to me?

<sup>30</sup>Pquiab zho, rëb zho:

—¡Por grëtaa guielntseeb ne noyun me, gane ziaadnie no me! ¡Telne niac me men ndzinli, niacxe lega guiaad-zo no me lo luu!

<sup>31</sup>Dzigo rëbchaa Pilat:

—Golsënie me, tose golgunquizh me mine been me; zigne nac xley to.

—Racladz no guetgazh me —rëb zho—. Ni nanle luu ganle, no ne nac no men Israel, grieelod ne nose gnabey guet tib miech.

<sup>32</sup>Ga brieequia mine bnee Jesús, zeene bzeet me ible zut miech me. <sup>33</sup>Dzigo bzëëb Pilat len yulow, rnabey me gocredz Jesús; bnaabdiidz me lo Jesús, rëb me:

—¿Pe nli luu nac zhirey men Israel?

<sup>34</sup>—Ne squi rnee luu —rëb Jesús—, ¿pe guic luu biaba, te no cho nëw lo luu ye?

<sup>35</sup>Pquiab Pilat, rëb Pilat:

—Nanle luu ganle led zha Israeld naa. ¿Pe nac sca ne ziaadnie zho luu nu? ¿Pe been luu? Sac gon zha ladzaque luu grè zho zha ne rnabey lo zhipxoz zho, zha biaadsan luu nu.

<sup>36</sup>Dzigo rëbchaa Jesús:

—Nli rey nac naa, per led lo guidzliu riida, telne niaca mine lo guidzliu riiw, dzigosi grèse zha ne nacie naa niactseeb zho, nsaand zho naaz zha Israel naa. Per na, zhaa zaatne nac naa rey.

<sup>37</sup>Pquiab Pilat, rëb Pilat:

—¿Rey luu dzigo lëè?

—Scaw gon —rëb Jesús—, nli rey naa zigne rnee luu i. Ible min co nacie bial naa gol naa lo guidzliu rii, ni bial naa bialseed naa miech gunbey zho mine nac diidzli. Ni zha ne zienal mine nac diidzli, zha co ngab lo naa.

<sup>38</sup>—¿Diidzli ye? —rëb Pilat.

### Bnabey Pilat tsiegut zho Jesús

(Mt. 27:15-31; Mr. 15:6-20; Lc. 23:13-25)

Zigne blozh sca rëb Pilat, briece Pilat ga güeynee Pilat lo grè zha ne bdzinnie me ga, rëb Pilat lo zho:

—Ni tib dol gon rapd men rii. <sup>39</sup>Per gzobse lni Pascw rii, rnab to rlaa cholze tib zha ne no ladzguiib. ¿Pe gnè to sca, mazd csilaa naa men ne nac zhirey to nu?

<sup>40</sup>Pquiabbe zho, rëb zho:

—¿Csilaad luu me! ¡Mazd psilaa Barrabás!

Ni laa Barrabás tib ngbaan nac Barrabás.

**19** Zeene gon Pilat sca rac zho, dzigo bnabey Pilat bla menguiib, bdeed dooguid zho Jesús. <sup>2</sup>Bzieecw zho bla lë yag guiets bzoob zho guic me, ni bgacw zho me tib lë lar nizhnie nlaan. <sup>3</sup>Dzigo psilo zho runnguzee zho me, nguiedz roptsie zho rnee zho:

—¡Bley na ganle, laa luu nacle zhirey zha Israel!

Ni rgap zho lo me.

<sup>4</sup>Wbiire Pilat brieequia Pilat zaatne ndxie grè miech co, rëb Pilat lo zho:

—Golwi ganle laa naa cuee me, glu naa me lo to, per gacnan to ganle rieguiald guet me; laa naa pquieple me rlu ni tib guieltseeb beend me.

<sup>5</sup>Zeene laa Jesús brieequia, nzobguicse me coron yag guiets co, ni nacw me lar nizhnie co.

—Golwi na ganle —rëb Pilat—, lëè me nu.

<sup>6</sup>Grè pxoz ne rnabey, ni grè menguiib ne rquianap yadoo, zeene gon zho me, psilo zho nguiedz roptsie zho rnee zho:

—¡None guet me! ¡Bnabey yquia me lo cruz!

Dzigo rëbchaa Pilat:

—¡Golt sienie me sca! ¡To golquiaa me lo cruz! Sangue naa, grieelod yquia naa me lo cruz; sac laa naa gonle peet guieltseeb beend me.

<sup>7</sup>Pquiab zho rëb zho:

—¡Rdziaap no xley no! Ni ley co rnabey ib none guet me, sac rquidie me rnee me laa me nac Xpëéd Dios.

<sup>8</sup>Zeene bin Pilat sca rëb zho, mazdraa bdzieb me. <sup>9</sup>Dzigo bzëëbnie me Jesús len yulow stib, bnabdiidz me lo Jesús, rëb me:

—¿Bnë dien cho menpaa nac luu? ¿Pa nac ladz luu?

Per ib pquiabd Jesús lo xtiidz Pilat. <sup>10</sup>Dzigo rëb Pilat:

—¿Pe nacne rquiabd luu? ¿Gon ganle naa rnabey, zrieelo csilaa naa luu, o gnabeygaa naa yquiaa luu lo cruz?

<sup>11</sup>Pquiab Jesús, rëb me:

—Ni luu nac zha rnabey niina, per telne niaca mine needzd Dios guielrnabey qui lo luu, grielod ne luu gnabey zha gac naa. Mincoxe waa, zhi nac xtol luu, mazdraa nac xtol zha ne biaadlo naa nia luu.

<sup>12</sup>Dzigo gocladz Pilat nsilaa me Jesús, per bzhiguield grë zha ne güeyсан me ga.

—Telne laa luu csilaa mgui qui gon —rëb zho—, rrieequia dzigo ye luu rlëënie César. Sac gon, grëse zha ne racladz gac rey, lo César ga racndaan zho.

<sup>13</sup>Zeene bin Pilat sca rëb grë miech co, bnabey Pilat brieë Jesús nëz ley stib. Dzigo güeysob Pilat lo xcan ne zo ley co, zaatne rzob me run me guielwxtis. (Dipse ley co, niapse quie lag now; gane rnee zha Israela Gabata.) <sup>14</sup>Lëë dze vispr lni Pascw co ga nagon, zig grolle dzew noyac grë min co. Dzigo rëb Pilat lo zho:

—Laa zhirey to nu gon. ¡Golsënie me!

<sup>15</sup>Psilo zho stib, nguietz roptsie zho, rnee zho:

—¡Beetgazh men qui! ¡Nabey yquia me lo cruz!

Rëbchaa Pilat:

—Zhirey to nac me, ¿ni racladz to ye gnabey naa yquia me lo cruz?

Pquiabbe grë pxoz ne rnabey rëb zho:

—¡Tibaque men ne nac zhirey no, ni lëë men co nac César!

<sup>16</sup>Dzigotaa mazd laa Pilat bloo Jesús nia zha ne tsiequiaa me lo cruz.

### **Pquia Jesús lo cruz**

(Mt. 27:32-44; Mr. 15:21-32; Lc. 23:26-43)

<sup>17</sup>Zeene laa Jesús brieë ga, rna tib cruz nroob ney me; laa zho zienie me. Bdzinnie zho me ro guiedz, zaatne rnee zho “Gui Beerguic Ngutoo”; <sup>18</sup>ga pquiaa zho me lo cruz. Ni pquiaa zho schop zha ntseeb, tibga zhicruz zho bzo cue zhicruz me.

<sup>19-20</sup>Nabey Pilat pquia bla lan diidz guic zhicruz me, rneew: “LËË JESUS MEN NAZARET NU, MEN NE NAC ZHIREY ZHA ISRAEL.” Pquiaw xtiidz zha Israel, xtiidz zha Roma ni xtiidz zha Gres. Nzian zha Israel gon sca quia guic zhicruz me, sac gaxpaa ro guiedz nac zaatne pquiaa zho me lo cruz ga.

<sup>21</sup>Nacne güey grë pxoz rnabey, güeylisqui zhow lo Pilat, rëb zho:

—¿Pe nacne pquiaa luu guic zhicruz mgui co, ne me nac zhirey zha Israel? Pe gacd nquiaa luu: “Rnee me, me nac zhirey zha Israel.”

<sup>22</sup>Pquiab Pilat rëb Pilat:

—Mīne pquia naa, laaw pquiale ga. Ni sca none guiaana.

<sup>23</sup>Laa grë mēnguiib ne pquiaa Jesús lo cruz ga, zeene blozh pquiaa zho me lo cruz, bzheñ zho xab me beēñ zhow tap lë, tib lëgaw biaannie zho tib tib zho. Laa lar ne rbix me, tiblagaque naca, ndiibda; <sup>24</sup>dzigo rëbchaa zho:

—Minritaa nagon dzuungrold ne. Mīne naca gotsaa dzio new rif, dzigo zha ne griequia zha co guiaanniew.

Ga briequia mīne raquiet lo Xtiidz Dios, zaatne rnee: “Xab naa, mīne racw naa nzian lë beēñ zhow bgaaza lo zho; laa mīne rbiix naa, bio zhow rif.” Ni scadaa beēñ gza mēnguiib co.

<sup>25</sup>Gax zaatne zo zhicruz Jesús ga, zo blalaa men wnaa. Ga zo xniaa Jesús, zo tib beļ xniaa me, zo Marí tseeel Cleof, ni Marí Magdal. <sup>26</sup>Gaxaque ga zo naa. Zeene gon Jesús xniaa me, ni gon me naa, rëbchaa me lo xniaa me:

—Beēñ cuent nagon lëe xpëed luu i zo i.

<sup>27</sup>Laa lo naa në me:

—Beēñ cuent lëe xniaa luu i gon. Bzhiguiel luu gan me.

Dzigo desde dze co, pcaania naa xniaa me bianie naa me lidz naa, pteedlo naa me.

### Gut Jesús

(Mt. 27:45-56; Mr. 15:33-41; Lc. 23:44-49)

<sup>28</sup>Rienle Jesús ne gataa laa me psiaal dziin ne pxeel pxoz me me gon me, ni par griequia grëse zigne rzeet lo Xtiidz Dios ted me, hor co bredz me rëb me:

—Rnab zhis naa.

<sup>29</sup>Gax lo grë mēnguiib ne quianap me ga, ga zo tib cant win no nziu bla. Zeene bin zho sca rëb me, rias tib zho bgadz zho tib lë zhiil lo nziu co, bzoob zhow guic tib goobgui nool güeyquiaa zhow ro me. <sup>30</sup>Zeene bdziñ nziu co ro me, pquiin me niipa, dzigo rëbchaa me:

—Lëew nagon, nataa laaw bza.

Zeene blozh sca bnee me, znuse pqianrun guic me; laa me blozh.

<sup>31</sup>Guini liu co nac tib dze ne mazdraa nda lo zha Israel. Nacne güey grë zha ne rnabey lo mēnguiiedz güeynee zho lo Pilat, gnabey Pilat tsietiits zho gzhibni Jesús ni zha ne pquiagza me lo cruz ga, zeena quietgazh zho lo cruz dze co; sac racladzd zho scaque quia zho lo cruz zeene laa dze nda co gdziñ.

<sup>32</sup>Dzigo pxeel Pilat bla mēnguiib. Zeene bdziñ zho, glose güeytiits zho ni tib zha ne quiagza Jesús lo cruz ga; blozh ga, güeytiitsaque zho ni tib zho. <sup>33</sup>Zeene bdziñ zho zaatne zo zhicruz Jesús, gon zho laa me gutle; nacne bdiitsd zho ni me.

<sup>34</sup>Hor co wbig tib mēnguiib co, bliz zho xlanz zho ro xcuxti me. Zeene bdoob zho lanz co, nis ne, ren ne brie ga.

<sup>35</sup>Naazhal gon znu beēñ zho me. Laaw rne naa lo to zigne gocsew. Golliladza, sac ne nligaa diidzliw. <sup>36</sup>Ga briequia mīne raquiet lo Xtiidz Dios, zaatne rnee:

“Ni tib dzit ne no me quitsd zho.” <sup>37</sup>Ni stib lugar, zaatne rnee: “Bii zanaque zho ganle cho nac men ne bliz lanz zho ga.”

### Bgueets Jesús

(Mt. 27:57-61; Mr. 15:42-47; Lc. 23:50-56)

<sup>38</sup>Laa José, tib men Arimaté, zeene bin me laa Jesús gutle, dzigo güey me lo Pilat güeynab me diidzbey par grieelo tselit me xcuerp Jesús lo cruz. Ye me xpëedscuel Jesús nac me, per pxobnen me ne ye me nacgza Jesús; sacne rdzieb me grë men Israel ne rlëe lo Jesús. Dzigo bdeed Pilat diidzbey.

<sup>39</sup>Nicodem, men ne güeyzodiidznie Jesús ga tib pcow liu, ye me güeynal zhits José; güeynie me zig galptsiptap kil tiblo zënex ne ríaa yaal ne lë mirr ni yaal ne lë áloe. <sup>40</sup>Zeene blozh biet Jesús lo cruz, psilo zho bdëeb zho zënex co xcuerp me; blozh ga, pchel zho me tib lar nquits; sac sca rqueets grë men Israel zhingutoo zho.

<sup>41</sup>Gax zaatne pquia Jesús lo cruz ga, niaa tib corral no niapse yag nex. Len corral co, ga ndieen tib baa tib cho quie, ni tib ngutoo gard ygueets len baa co; <sup>42</sup>dzigo nacne gase güeyqueets zho me, sac zhile runfalt sëeb dze nda co, ni baa cose nac mine ríaan gax ga.

### BRIEBAN JESUS

(Mt. 28:1-10; Mr. 16:1-8; Lc. 24:1-12)

**20** Goḷ dze ne rzobni zhmalá, silgaw, scase bii ncow rnaw, brieé Marí Magdal zie me ro baan Jesús. Zeene bdzin me, gon me laa quie ne niioog ro baa co bdiooble, laaw zole tib nëz.

<sup>2</sup>Hor co lëäléd wbire nguzhoon me, biaad me zaatne no no grop no Pedr, biaadnie me diidz lo no, në me laa zho güeybeele Jesús len baa, dieen palo güeysan zho me.

<sup>3</sup>Dzigo lëäléd, brieé no grop no Pedr, zioso no ro baa. <sup>4-5</sup>Zeene bdzin naa ro baa, blëz naa niip, dzigo bdiixlo naa len baa gon naa laa lar ne briel me zhoob ga; per bzëëbd naa. Laa naa blozhdze bdiixlo len baa, zeene laa Pedr blanso. <sup>6</sup>Zigne blanso Pedr bzëëb Pedr len baa, gon Pedr nligaa laa lar co zhoob ga, <sup>7</sup>niicle lar ne briel guic mew, laaw zhoobaque ga; ndibëdsew, zhooba tib lad.

<sup>8</sup>Nacne bzëëbaque naa. Zeene gon naa zha zhoob lar co, dzigoraá bliladz naa ne nli brieéban me. <sup>9</sup>¡Sac hor co, bii gard tsoguic naa zha rnee lo Xtiidz Dios; sac ga raquiet ne ible zrieéban me!

### Gon Marí Magdal Jesús

(Mr. 16:9-11)

<sup>10</sup>Ye Marí biire blanso ro baa ga stib. Zeene wbii no ga grop no Pedr, laa Marí bii zo ro baa ga.

<sup>11</sup>Ga name zo Marí roon me. Sca roon me, tibaque zeene bui me nëz len baa co, <sup>12</sup>gon me laa chop anjl zob leen co. Dib nquitsbiese rna xab grop anjl co,

tib me zob n̄z ne bzhoob guic Jesús, stib me zob n̄z ne bio ni me; <sup>13</sup>dzigo r̄ebchaa me lo Marí:

—¿Pe nacne roon luu?

—Roon naa —r̄eb Marí—, sac laa zho biadbee xcuerp Jesús nu, na dieen pa güeysan̄ zho me.

<sup>14</sup>Loxaque blozh sca bnee me, zeene ptsire lo me gon̄ me laa tib men̄ co zo gax zhits me. ¡Per ib beenbeyd me ne Jesús!

<sup>15</sup>—¿Pe nacne roon luu? —r̄eb Jesús—. ¿Cho rguib luu?

Leḷ güeynie guic Marí r̄eb me bod men̄ ne rquianap gaw, dzigo r̄ebchaa me: —Bzhiguiel̄, tel̄ne luu biadbee me nu, bn̄e dieñ pa lo güeysan̄ luu me; zeena ga naa gaxi naa me.

<sup>16</sup>Hor co bneel̄ Jesús Marí, bredz me me. Zeene bin Marí l̄e me, l̄eél̄ed biecw me; dzigora a beenbey me Jesús.

—¡Maestro! —r̄eb me—. ¡Mod luu i!

Laa me zie gbig me lo Jesús. <sup>17</sup>Dzigo r̄ebchaa Jesús:

—¡Xeend luu naa! Sac gard guia naa lo Pxo<sup>z</sup> naa gbaa. Mine naca, güey güeynie diidz lo gr̄e zha ne bz̄enaḷ zhits naa; gudz lo zho: Laa naa nole n̄z guia naa lo men̄ ne nac Pxo<sup>z</sup> ne, men̄ ne nac Dios ne rdziunbey ne.

<sup>18</sup>Hor co l̄eél̄ed wbi Marí ga, ziaadnie me diidz lo no. Blanso me bzodiidz me zha gon̄ me Jesús, ni n̄e me lo no zigne r̄ebse Jesús lo me ga.

### Brieequia Jesús lo xp̄eēdsuel me

(Mt. 28:16-20; Mr. 16:14-18; Lc. 24:36-49)

<sup>19</sup>Pcow liu dze dmingw co, gr̄ese no ne nac no xp̄eēdsuel me laa no pcaalsa; loxaque Mazh runfalt. Dziits nquiaa no yag yu, sac rdzieeb no gr̄e zha Israel ne rl̄eēnie me. Laa no ndxie ga, tibaque zeene brieequia me bzo me glowtaa lo no; pquiaabdiuzh me no. <sup>20</sup>Blozhse pquiaabdiuzh me no, dzigo blu me len̄ nia me lo no, zaatne biaaz clav zeene pquia me lo cruz, ni blu me ro xcuxti me. ¡Gr̄ese no per nli rley no zeene bdzion̄ no ne nli mew! <sup>21</sup>Blozh ga, n̄e me lo no:

—¡Laa naa rnedz tib guiel̄bley zdoo to, zeena peet tsienied guic to! Zigne pxeel̄ Pxo<sup>z</sup> naa naa bial̄ naa, scagaa niina laa naa rxel̄ to.

<sup>22</sup>Dzigo blub me lo no gr̄ese no.

—Golcaania Esp̄iritu Sant —n̄e me—. <sup>23</sup>Ni zeene gon̄ gun̄ to tib miech perdon, scaque Dios zun̄ me zho perdon; laa tel̄ne siguiel̄d zho gun̄ to zho perdon, laa zho biaanle lo xtol̄ zho ga.

### Gon̄ Mazh Jesús

<sup>24-25</sup>Zeene bdzion̄ no Mazh (Mazh ne rnee zho “M̄eēdgrop” ga), bzodiidz now lo Mazh, per bliladzd Mazha, rnee Mazh:

—Rliladzd naa mine rnee to i gon̄. Zliladz naaw, per haxta gan̄lo naa me, haxta gan̄ naa len̄ nia me zaatne biaaz clav, ni cteed-xug naa ga; ni cs̄ēbnia naa ro xcuxti me zaatne biaaz lanz ga.



<sup>26</sup>Goc xon ngbidza, laa no pcaalsaque leñ yu co stib; hor cosi yele Mazh ndxiegrë no ga. Scaque dziits nsioog no ro yu, per tibaque zeene bdzion no laa Jesús bzëëb leñ yu ga stib, bzo me glowtaa lo no, pquiaabdiuzh me no. Blozhse pquiaabdiuzh me no, <sup>27</sup>rëbchaa me lo Mazh:

—Wbig na Mazh, bui leñ nia naa, psëëb mzhugnia luu nu. Dien nia luu nu, psëëbnia ro xcuxti naa. Gacchopdraa guic luu, sinque bliladz ganle ne nli mban naa.

<sup>28</sup>Dzigoraa bliladz Mazh ne nli mban me.

—Nasi rliladz naa mban luu —rëb Mazh—. Luu nac men ne rnabey naa, luu nac xDios naa.

<sup>29</sup>Pquiab Jesús rëb me:

—Laa luu rliladz niina, lëëcxë laa luu gonle naa waa. ¡Dichos zha ne gliladz ne nli mban naa, niicle ranð zho naa!

### ¿Pe nacne pquia grë diidz rii?

<sup>30</sup>Lo lal ne bzënie Jesús no, ndaldoo milagr ne bdzion no been me, led grëda raquiet lo guits rii. <sup>31</sup>Mine pquiase naa nu, laaw pquia naa zeena zeene glab tow, guien to ganle ni gliladz to: Jesús nac men ne biaadsilaa ne lo xtol ne, Dios bzooblo me biaad me, ni Xpëëd Dios nac me; sac zha ne dib zdoo gliladz cho nac me, zgaa zho tib guielmban ndzon ne gdzind dze lozh.

### Gon zho Jesús Galilé

**21** Bded ga, wbiire briequia Jesús lo no stib, zaatne nac ro nisdoo nroob ne rnee zho Tiberias.

<sup>2</sup>Tib bdze dzew, tipse ndxie no gza no Simón Pedr, Mazh, Natanael (men ne nac men Caná ga), bets naa Jacob ni schop zha ne nacgza no. <sup>3</sup>Tibaque zeene në Pedr, laa Pedr tsie gooz mel. Dzigo rdzieets no:

—Yeque no sca zia guio ne.

Dzigo bziaab no tib leñ barcw win gza no, laa no zio.

Dipse guieel bdzienie no barcw co lo nis, per ni tib mel bgaad. <sup>4</sup>Laa liu ziaadle lozh guini, zeene bdzion no laa tib men co zo ro nis, per ni tib no bdziunbeyd me. <sup>5</sup>Dzigo bnee men co lo no, në me:

—Yo to dien xin, ¿pe bgaa ma?

Pquiab no rdzieets no lo me:

—Choot ma bgaad.

<sup>6</sup>Dzigo nëchaa me:

—Golron guiee ne rgaa ma i nëz derech ganle, znaaz to ma.

Dzigo bron no guiee co nëz derech. Zeene laa no cueew lo nis, ib lëbd no glis now; ndaldoo mel ne biodzë lena.

<sup>7</sup>—¡Pedr! —rep naa—. ¡Bina ganle, xmaistr ne i gon!

Zeene bin Pedra, lëëlëd wbix Pedr xab Pedr, biab Pedr lo nis; psilo Pedr bzhoobnis Pedr briequia Pedr ro nis. <sup>8</sup>Laa no biaan leñ barcw ga; nole

bdzinniew zaatne nac ro nis. Maase tapgaltsii metr sca bdiobniu no guiex co lo nis.

<sup>9</sup>Zeene brie no len barcw, bdzion no laa gui noyecl, laa tib mel zhooble lo gui co, ye guietxtil ne. <sup>10</sup>Dzigo në Jesús lo no:

—Goltënie bla mel ne blozh bnaaz to i nu dien.

<sup>11</sup>Dzigo güey Pedr biepe me len barcw, güeyxadz me guiex ne no mel ga; dzigo bdoobniu mew bdzinnie mew haxta zaatne nacpaa ro nis. Mel tafa, niapse ma mbeew, zeene bgab ma rgaa ma tib gayoo chooptsiiptson lo grë ma; niicle scataa nzian ma, per blëb guiex co, briezda.

<sup>12</sup>Blozh ga, bredz me no, në me:

—jGoltë na, zeena gowxeren to!

Ni tib no nbadidzd lo me dien pe nli mew; sac, jriennpaa no ne nli mew!

<sup>13</sup>Dzigo wbig me bdiiz me guietxtil co lo no, bzhen me mel ne, bneedz me ma lo no.

<sup>14</sup>Ga bion vult briequia me lo no wlal ne brieaban me.

#### Bzodiidznie Jesús Pedr

<sup>15</sup>Blozhse bdiowxeren no, bredz Jesús Pedr, psilo zho bzë zho grop zho; dzigo rëb me lo Pedr:

—Simón (xingan Jonás), ¿pe nli dzigo rleynieraa luu naa que grë zha qui?

—Nquialadz naa luu —rëb Pedr—, ni nanlegaa luuw ganle.

—Pteedlo grë xpëcwxiil win naa sca —rëb me.

<sup>16</sup>Wbiire me, rëb me lo Pedr:

—Simón (xingan Jonás), ¿pe nlipaa dzigo rleynie luu naa?

—Nquialadz naa luu —rëb Pedr.

Dzigo rëb me:

—Pquianap xpëcwxiil naa sca.

<sup>17</sup>Wbiireque me stib rëb me lo Pedr:

—Simón (xingan Jonás), ¿pe nlipaa nquialadz luu naa?

Zeene bin Pedr sca rëb me, mban goc zdoo Pedr; sac gale rac tson vult zinabdiidz me lo Pedr, dzigo rëb Pedr:

—Luu nac men ne rnabey, luu nana grësew, nan luu ganle nquialadz naa luu.

Dzigo rëb me:

—Telne nli nquialadz luu naa, yquiaanap luu xpëcwxiil naa sca.

<sup>18</sup>Zeene gon bii ngüieg luu, led rsoladz luu ganle luuzhal racw xab luu, rrieelo rie luu zaatne racladzttaa luu; per zeene gon laa luu gac mengolraa, loxaque nia luu glis luu zhaale zha ne ygacwxab luu, ni zienie zho luu zaatne ni racladzd luu.

<sup>19</sup>Zeene znu rëb me lo Pedr, ga bzeet me zha nac guielgut ne ygaa Pedr, ni ga glu Pedr ganle pa lotaa men nroob nac Dios. Blozhse ga, rëbcha me:

—jDënal zhits naa!

<sup>20</sup>Dzigo nalaque naa zhits me grop me Pedr. Zeene ptsire lo Pedr, gon Pedr laa mëedscuel ne scataa rleynie me ga, laa zho nal ga, zha ne zobpaa cue me

ga lo xtsee co, zha ne wbigpaa bñabdiidz lo me dien cho nac zha ne tsielo me ladznia zha ne gut me; dzigo rëbchaa Pedr lo me:

<sup>21</sup>—Telzhe zha rii waa, ¿pe nac mine ted zho?

<sup>22</sup>Rëbchaa me:

—¿Pe nadien gun luu ne racladz luu gacnan luuw? Telne gacladz naa, zrieelo gnabey naa gban mgui haxta len dze ne guiañ naa stib. Led xcuenta luu ga. ¡Na zeen ðenañ zhits naa!

<sup>23</sup>Zeene gocnan grëraa zha ne rliladz Jesús sca bnee me, grëse zho tibaque güeynie guic zho gdziñdraa dze guet naa. Per led scada, sinque znu naca, rëb me: ¡Pe gun Pedr! Telne gacladz me, zrieelo gnabey me gban naa haxta gañ dze ne guiaad me stib.

<sup>24</sup>Grëse mine pquia naa nu gon, grop lo naa gon naaw, grëse zha ne nacgrë no nanpaa zho ganle ne diidzli rne naa.

<sup>25</sup>Ndaldooraa grë ncuaañe nroob ne been Jesús, tel niaca mine yquiaw grësew, ni ygaad dib lo guidzliu tsotsow grë guits ne yquiaw ga.